

松龕先生文集

松龍先生文集卷三

致屬下十七縣書

延建邵道任內

延建卻一帶地居閩省上游萬山叢雜匪盜易藏東北則界連浙省擔匪肆行苦累行旅西北則接壤江右游手匪徒跬步卽入往往結會傳徒暗相勾結又每年茶季柵寮遍野莠良錯雜尤易藏奸其西南之永春州三屬地瘠山深素稱盜匪淵藪結隊而來率以延建邵爲取求之地沙縣永安尤溪順昌則其出入之門戶也上年年歲大稔秋冬之間頗稱安靜本年二月間順昌卽有恤餉被刦之案三月間沙縣有布店被刦之案四月間建陽有茶客被刦之案盜風熾盛已露萌芽若緝捕毫無起色必至搶刦蠶起不可禦止竊思弭盜之法全在無事之時派得力之丁役水陸巡查

訪外來之游匪隨時懲辦其尤要者則在乎編聯保甲行以實心風聲既肅匪盜自然裹足一切成法講求已久服官者諒無不爛熟胸中顧或知而不爲以致接踵失事者一則簿書叢雜乏暇豫之精神一則缺分瘠苦乏巡防之經費且曲突徙薪其效不過無事而止而一切任之亦或可以旦夕無事經閱歷則總以無動爲大訪幕友則勸以息事自全此所以未雨之綢繆人人知之而不肯爲之或且視爲無事自擾者也然防範旣疎宵小因而盤踞一旦越貨郊垵紛紛免脫重案不破隨以嚴參此時覓眼購線急不暇擇甚至擲不貲之金錢而不獲緊要之一犯吏議難寬漏卮莫補狼狽情形殆難名狀卒之計其所費殆十倍於巡防而事之成虧乃不可以同日語覆轍相尋可爲太息弟承乏於茲已屆月餘

才識淺短無以襄助諸君子一知半解不敢不盡其懇懇之愚思欲互相黽勉於所謂除莠安良者少效其萬分之一至州縣之萬苦萬難弟雖未爲身歷知之頗稔矧在閩省尤爲局促不量其力不原其情牌札紛行事事苛責案頭多疊故紙於吏治誠何裨益顧處此匪盜縱橫之地不得不於艱難困頓之中講求捕治之策矧大憲鑒衡精澈舉劾分明果著循聲必蒙荐剡身名俱泰尤爲諸君子致祝者也

致某方伯書

福建汀漳龍道任內

侍昨因泉州大營兵丁口糧加成七分與鎮府會稟兩院憲請將漳海防兵簡汰病弱口糧加成六分九月初十日奉到督憲批示如稟辦理隨復將簡汰各兵數目並挑留各兵數目具稟亦經奉

到督憲批示侍隨卽行知各營並移冰案矣昨少愚奉尊處批示以海澄之兵有進剿之用准照泉州大營按七分發給此外皆一律四分現已具詳等因權衡緩急自是公允惟漳州現在防兵全聚於海澄郡城銅山三處海澄之危險固不待言而郡城距海澄四十里一水相通勢連唇齒萬不能以海澄爲征兵而以郡城爲防兵以事實論之海澄斗大之城逼隣狡寇兵止一千數百名自守不暇何暇議剿海澄一有警動則郡城之兵卽須前往赴援郡城一有警動則銅山之兵又須星夜來援勢不能強分厚薄致令各兵怨謗侍與鎮府相商將久戍海澄之病弱各兵已裁去八百餘名現按六分給發較之原發數目並不加多現在各兵俱有鼓舞踴躍之意緣兩奉督憲批示倥傯之際但欲收拾兵心使其出

力故隨卽行知各營未及候省局議論今若遵尊處批府之文海澄得七分固加厚矣而郡城銅山之兵已行六分明文忽又減爲四分不特兵心解體且虞激出變故誠知不練之驕兵未必可恃然除却此兵更用何人官軍累挫之餘氣本消沮若又使之兩餐不飽隱懷歛望其見賊而卽走也可先事券矣兩年以來當事止知調兵而不憂兵之不可用饑與寒莫之恤誅與賞莫之用其名爲兵實則市人水中已矣逆夷登陸來攻望風輒走墮名城直如彈紙此何故也今卽不能如古人之豐衣美食以養戰士而粗糲亦必使之充腹布褐亦必使之蔽寒然後辛勤訓練或尙可加遣一矢若謂今日之兵卽優恤亦歸無用則海上連城將拱手而授之逆夷耶漳州此時形勢其危迫甚於泉州海澄固在虎口之中

郡城亦爭呼吸之際豈可與興化以北之海口一例而論侍在兩處每夜間登城與守陴者垂泣告語勉其敵愾其感動與否不可知聊以盡吾心焉口糧加增二分每日多得銅錢三十文或買米一升或添補寒衣一件煦煦之惠未必有補而冀其少知感激見賊時或尙有遲迴不走之人若沽名釣譽欲取媚於兵丁侍非武弁何爲出此例之困人上下同病其無可奈何之處不得不宛轉相隨且政有大體省局乃筦樞之地侍豈敢故爲異議致涉紛歧惟事關安危大計不比尋常我不能持例文而驅逆夷卽奈何持例文而苦戰士漳海防兵侍已遵督憲批示行知各營一律加成六分萬無改易之法若如局議海澄七分漳郡銅山同加七分誠爲厚幸否則俯如六分之稟亦可相安無事若將郡城銅山已行

六分之後再行減爲四分則無論戰守難期且立致鼓噪之變侍雖至愚必不敢依違附合致釀禍變侍與鎮府前後兩稟並督憲批示俱已奉移伏望俯加點察着賠惟命參撤惟命頭可斷議不可改必嫌其違例要名誠不如早罷斥之免致貽誤巖疆實爲至幸言之自知過激幸希格外原之

致趙盤文明經謝石珊孝廉書

兩兄足下英夷之亂北方想亦有聞然未能得其詳也紅毛諸部在極西北英吉利乃紅毛之最強者其國至中土七萬餘里自大西洋小西洋南洋東南洋沿海侵占之地約數十處其船最堅大其炮最猛烈自國初以來在粵東通商漸以鴉片煙愚弄中國賤其財貨萌心窺伺已非一日上年粵東查辦煙土焚其鴉片兩萬



箱遂啟兵端上年夏間突陷浙之定海旋赴天津遞呈訴冤聖主意在懷柔禔兩督之職林少穆命琦相赴粵查辦琦相爲逆夷所愚弄弛備求和定海雖退還而旋攻陷粵東之沙角大角又攻陷虎門兵臨省會琦相逮問下獄奕山隆文楊芳三帥徂征今年四月間進兵初得小勝旋即大敗省城幾陷不得已以白金四百萬兩賄之逆船乃退人共知爲以薪救火禍不旋踵而不料禍變之驟移於閩浙廈門者閩中咽喉之島水師提督興泉永道駐之上年夏間曾有兩船來廈滋擾以礮擊之乃退今年顏制軍駐廈督辦經營半載安炮四百餘門大者萬斤屯兵六七千不可謂之無備矣突於七月初十日逆船三十餘隻駛入廈門開炮我兵亦開礮對擊我之鐵礮不如彼銅礮之輕靈我岸上之炮又不如彼船中之炮

之稠密相持半日大炮臺被其攻破遂致全軍潰敗死難者一總

兵

江擬雲兩遊擊

張龍

一守備

王世俊

千把數人顏制軍退守同安厦

門遂爲逆夷所據弟所轄之海澄縣距厦三十餘里所駐之漳州  
距海澄四十里皆一水相通直抵城下乘風順潮片帆可達向恃  
厦爲門戶兵皆屯於沿海各口而兩城未設重兵一旦厦門失守  
強寇直逼寢門之外民心惶駭一日數驚文武官中有將家眷倫  
送出城者百姓紛紛有逃亡之意弟極力撫以鎮靜誓以死守調  
兵募勇運米攔港勸練諸事晝夜拮据略有頭緒人心乃漸安貼  
逆夷火輪船直駛至海澄城下因水淺退去其杉板屢次窺探我  
兵靜伏於岸上不肯輕動幸未失事逆夷住厦門十日其大隊駛  
往浙洋八月中旬重陷定海

定海百姓兩年中兩  
遭大劫可爲悲痛

下旬陷鎮海又陷寧

波慈谿餘姚逃竄一空殉難者欽差大臣裕謙

此公豪傑之士以滅賊自任力竭而死天下悲之

總兵王錫朋鄭國鴻葛雲飛同知舒恭受知府鄧廷彩全浙大震現命奕相經爲揚威將軍特將軍依順文侍郎蔚爲參贊率北路之兵赴浙援剿此浙江現在之情形也廈門自逆船大隊開出之後留兵船五隻據廈門對面之鼓浪嶼其貨船時往時來者五六隻我兵欲用火攻之策而逆船堅而且高礮極猛烈又散泊於海中無從下手與之相持則我兵之耗費不貲軍餉難繼此時我不動彼亦不動我一動則無必勝之策而彼或肆豕突城池有失陷之虞現奉旨派廣東怡中丞良爲欽差大臣來閩會同辦理大意先固守而後議攻然攻之之法殊無把握竟未知作何了局查逆夷船堅炮利海中斷不能與之角逐卽在海岸安礮與之對擊亦

是下下之策至於登陸步戰則非彼之所長其所用者自來火之小鎗不能過四十步此外則短刀而已我兵之排鎗弓箭長矛等器彼皆無之彼又地利不熟何至不能抵禦然乃連城失陷而陸路亦致敗潰者彼以重資買我內地之奸民爲之牙爪我之虛實彼無不知戰則驅漢奸爲前導爲之致死而我之官兵則承平日久人不知戰名之爲兵實則市人無紀律無賞罰見賊卽走此其所以敗也逆夷以商販爲生以利爲命並無攻城掠地割據疆土之意所欲得者中國著名之馬頭以便售賣其貨物耳今見官兵連年敗挫知中國孱弱無能其志愈侈其謀愈狡非大挫其鋒其勢未有所止而水戰非我之所長倉卒無制勝之術欲與之議和則彼且索銀一千數百萬又必索沿海各要地爲馬頭豈能聽之

耶二百年全盛之國威乃爲七萬里外之逆夷所困至使文武將帥接踵死綏而曾不能挫逆夷之毫末興言及此令人髮指背裂泣下霑衣弟本書迂安知兵事大憲誤以爲有用而置之巖疆要地一年以來馳驅海岸日不暇給自廈門失守之後則寢食不遑心力交困勞悴不堪言狀自念一介寒微曾受知遇當此危難之際正當捐糜圖報逆夷叵測事無了期與此土爲安危與此城爲存亡以八字自堅曰竭力盡心聽天由命如是而已幸而境土獲完身家無恙自是如天之福非弟之所敢必也家鄉路遠聞海疆之亂諸相好必深念鄙人軍書匆促中書此數紙親友之詢及者祈轉示之

上顏魯與制軍書

制軍名伯燾廣東人前任閩浙總督

前一次差回蒙以手諭下畚敬悉綠野娛情家祥蔚起雖溫公之居洛不過暫時養望而神仙境界羲皇歲月聞之令人神往來諭所云生妬者殆不虛也繼畚從事糧台承怡制軍待以國士明知苦海無涯不敢萌退諉之想五月二十四日奉部文蒙恩授廣東按察使旋閱邸抄乃知四月十七日已先授廣東鹽運使緣運使行文較遲故尙未接到也受殊恩於危難之時圖報無術不禁媿懼交集謝摺於二十七日拜發俟此間接手有人卽束裝北上迎見批摺當在衢杭一帶尙恩准入見度嶺已在梅初若徑令赴任則中秋後可抵羊城眷口擬僑寄南昌俟夷務平定再行接往伏念繼畚材本庸下蒙鑒肫愚登之卓薦一旬之內兩邀遷擢皆在珂鄉尙奉職無狀不特仰累知人之明而論者將謂吾師移荆棘

於桑梓將若之何臬比伊邇一切利弊想吾師不惜煩言以申諭之也浙事已無可言五月上旬吳淞失守金陵姑蘇現不知是何情狀事勢如此正不知何時底定耳

謝劉次白中丞保薦書

本月二十四日辰刻奉到憲行部文知蒙恩提刑粵省悚惶無似竊念繼畚賦性迂拙才能不越中人自戊戌春仲來閩循分供職庚子七月調署汀漳馳驅海壖一年有半境土幸獲瓦全實由天幸得書中考亦云幸矣乃蒙列之薦牘而署之曰清廉明達有守有爲今年正月委辦糧臺復以兩言重入疏內在大臣爲國求人不能猝得其人而偶得其近似者遂不啻若自其口出在繼畚則既慚且懼慮操作或有玷汙擔任或致顛越以遺舉者之羞而卒

未敢自必其能免焉否也不意聖主旁求以信大臣者而卽信其所舉之人拔之疎賤之中而畀以陳臬之任聞命以來屏營昕夕繼畚雖作外吏名法之學實未究心粵東古稱脂膏之地檢閑稍有不慎卽蒙垢恥又兩年以來頻遭夷難奸宄肆行干冒法紀非一日矣以繼畚才力之淺短而又處難治之地值難爲之時倘於所謂清廉明達者不能肖似而或反戾焉累知人之明而遺門下之辱者何可勝言此所以不敢以遷官爲喜而深以爲懼也繼畚謝恩之疏於二十七日拜發俟有代者卽束裝北上謹當摳謁座隅面聆提誨漢唐名賢於舉主皆崇師事之禮繼畚遷任他省無攀附之嫌謹從古義非效時趨

致王雁汀中丞書



前奉報章辱叨存注並令將地方要事直陳且曰勿爲贊語大君子之虛心求治殷切如此凡在部民誰不樂有芻蕘之獻况弟夙蒙知愛事關桑梓詎敢以世俗之淺意致飾於長者之前哉伏念敝省向來有饒裕之名士大夫之宦遊斯土者毅然矢滿載歸來之志南塘夜出習以爲常甚且昌言於廣座之中而恬然不以爲愧民間之疾首蹙額而無所控訴者久矣近年大案疊出稍稍斂迹然染指嘗鼎之事亦尙不免自節鉞臨莅以來舉錯分明風聲清肅又且勤於咨訪幽隱畢達向之聲名不潔者皆勉自檢束圖爲晚蓋而其講操守者益爭自濯磨蓋有視盜無粟避債無臺而咬定牙根卓而不取一錢者此其人讀書而能自立非必沾沾於沽名然非大中丞之激濁揚清豈能興起若是哉官清則狼貪之

胥吏虎冠之差役不敢公然搏噬而山谷耕鑿之民得以自安天日不致有鬱而不伸之氣此執事已著之成效通省士民之所周知非弟一人之諛辭也此時之所宜講者惟緝捕一事耳南路之祁太榆徐平介北路之歸化城一帶盜案層見疊出向來太汾之盜皆謂出於交城之胡盧峪口北之盜皆謂出於近邊之蒙古今則與此兩項人絕不干涉皆山東人爲之省南之盜皆係賣棉線花帶或賣絨線又或跑解馬耍把戲散遊各鄉聚至二三十人則驟出行劫得贓則星夜馳回捕役無從下手眼線無從購覓其中山東人居十之八九河南直隸人亦間入夥其有稱陝西人者詐也口北之盜皆山東騎馬賊散於各廳之村鄉店賧之黠惡者暗與通線客商往來銀錢貨物驟馬往往被劫蒙民交雜之地事隸

七廳法制向本疎略盜劫之橫行無忌已七八年矣其地雖在口外而生意皆祁縣忻州之人兩地之元氣未傷所恃者東西兩口今乃竟成畏途則亦煞有關係也太汾各縣之盜案受害者當舖富戶口北之盜受害者專在客商山東盜風承平時且甲於河北今又黃河屢決湮爲澤國者數年糧船不行水手之賦閒者以數萬計弱者轉死溝壑強者四出爲盜乃必然之勢太汾數大縣夙有富名歸化各城生意夙稱繁盛羣盜之集羶於此蓋亦無怪其然今欲就案搜捕則盜已遠颺別省捕風捉影案無破法保甲之法守望相助最爲善策然不但口北荒略之地勢有難行卽太汾富庶之邦亦難驟效盜所睥睨者富家與貧人無涉富家少而貧者多平日又不肯稍破慳囊周卹貧戶既存幸災樂禍之心豈有

被髮纓冠之救地方官雖諄諄勸諭終亦有名無實竊以爲亡羊補牢之計必須太汾數大縣通力合作此時省中候補廳州縣人數衆多擇其幹實而能耐辛苦者每縣派一兩員帶領幹役分路赴各鄉巡查如有外省人形迹可疑者卽帶回縣中訊問並嚴諭地保董事人等遇有此等人不准容留宿食帶回之人縣中細加盤詰其神氣桀惡者不妨查案嚴訊如無可詰則備文遞回原籍數大縣如此辦理勢難盤踞猶恐潛匿於附近各大縣之旁縣則附近之各縣亦須嚴密稽查如此辦法所謂打草驚蛇雖不能捕獲一盜而風聲一播已來者必逃散未來者必裹足雖未能拔本塞源而揚湯止沸之效似可操券其所以必須委員者因各大縣案牘煩多又大半孔道疲於審讞困於應酬雖有賢能亦不能時

時下鄉專辦此事又事止徙薪災非剝膚得已則已誰肯日日勞神爲此目前無效之事且一縣爲之而旁縣袖手盜之伏於旁縣者仍乘間而行劫於本縣近功小效亦且難致誰不廢然而返耶口北地方情形不同此輩聚散究在何處弟於彼處情形不熟無從置喙惟七八年來客商之遭害者指不勝屈報官無益遂亦隱忍而不報向使稍稍著意稍稍動手或當不至橫肆若此耳弟在外多年地方官之怕多事而惟求省事到處如一邱之貉豈敢無端生事開此討人嫌之口惟承大君子殷殷下問一得之愚不敢自闕且此一片土現尙瓦全爲梓鄉靜一日吠鳴卽爲國家留一分元氣所陳是否有當乞俯賜采擇幸甚

覆恒月川方伯書

十七日奉到賜書三緘敬聆一切高唐竄敗餘匪探報人各異辭既有催餉之寄諭則事之未了可知昨有人自京來踰於初六日出都據云高唐並無已跑紅旂之說足見探報之不足憑也張叅戎前已差兵勇四名由兩路馳往偵探尙未回報弟恐兵丁偵探未能明確已差人赴壺關喚劉福星令其星夜馳往庶可得一准信誠如來諭不在乎多費半月口糧也省中如得確信仍望飛速示知爲禱詳閱地圖在平之正西爲東昌再西爲冠縣再西爲直隸之廣平磁州再西爲豫省之武安涉縣再西卽晉省之遼州黎城東西相望計程途約六七百里現在旣無確信遼黎之兵未敢遽撤和順守口鄉勇係紳民捐辦費用不多卽緩撤一月亦無關係也此時撤兵北鎮之兵取道遼沁汾州之兵亦取道沁州全無

妨礙惟平陽一帶之兵則須取道於陽城沁水平陽兵之在澤州壺關者共三百零名本擬作第二起在東陽關者有三百零名本擬作爲頭起惟現接張秋屏來信陽城刁民負隅已有揭竿之勢渠已通稟省中自己周知揆度情形恐不能平善了結昨有人鈔來各刁民告白頗多狂悖之語且聞省城潞安兩處沿路安置探信之人若有兵來卽作抗拒之計今若將撤回之兵經過陽沁刁民疑爲搜捕恐其倉卒滋事且刁民告白中本有軍差騷擾之說兩縣正當紛擾陽城騾櫃已拆書差全散亦恐不能應付一停頓卽慮生事端若迂道北行則示弱刁民恐益堅負隅之念且與舊章不合潞沁汾沿途州縣必有難色而民間供應駝騾亦恐別有異議弟與陳劍芝曾經熟商深以爲慮前因南路之兵過於怯弱

故東陽關擬暫留北路兵三百而將平陽之三百零名於頭起先行撤回今既有此窒礙只好將北路兵作頭起撤回暫留平陽之三百名作爲第二起然陽沁事葉程兩君未到能否善了何時能了尙不可知而輝縣之事官被毆而不敢校趙固鎮現又聚集三千人製有鎗礮刀矛三日一操潢池弄兵毫無忌憚將來能否解散亦未可知蕭牆之憂竟難測度弟奉命專辦防堵一事高唐事一經完結卽應撤防歸報不特陽沁之事不敢與聞卽輝縣之事豫省積薪厝火諱莫如深晉省未見明文亦豈能形之奏牘議辦坊堵現因撤兵一事頗有窒礙不得不縷悉密陳祈轉回中丞究應如何辦法懇卽飛示爲禱

覆鍾石帆觀察書



頃鄉人遊塞上者稱道豐州之治行甚悉私心傾嚮久矣邇聞移節冀州贊襄全晉之治通省官民欣欣額手昨奉賜函問東方邊口情形大君子集思廣益乃及於知途之老馬自古當大任者莫不如此弟受兩朝深重之恩又事關桑梓安危分應知無不言言無不盡所愧年力衰殘智計昏短自乙卯上黨撤防丙辰卽授徒平遙閉門課訓邸報從不借看時事一無所聞近兩年來老病支離恒數月不出戶庭故人偶有停車枉顧者亦竟不能報謁桑榆暮氣志意頹唐其不足與言也久矣辱承下問媿無以畚僅就所知大略言之弟頃年督辦遼潞澤防堵由省垣先赴遼州查看各口後至潞安之黎城查閱東陽關卽赴潞安駐札其壺關陵川各小口道路崎嶇不能親往僅委員弁查看攔車一口係大路以距

賊遼遠亦未親往統計東方各口北起和順南迄陽城綿延七百餘里大小不下四十餘處再南極解梁蒲坂口隘更不知凡幾若不分緩急處處設防卽調兵滿萬而散布山谷之間亦且落落晨星無濟於事弟在上黨時曾令地方文武將各口隘繪圖貼說彙集流覽然身到者一目了然未到者不能也東方之賊可慮者捻匪來輒數萬慣於殺掠與長髮賊相表裏近聞渡河飽掠爲鄉團擊敗已歸皖省巢穴此時窟擾直隸之廣平一帶者乃館陶冠縣之白蓮教饑民附和搶掠教匪之最強者惟嘉慶年間川楚之役衆至數十萬用兵至八九年方能殄滅至北方教匪最爲無能乾隆年間之大名臨清嘉慶年間之滑縣道光年間之趙城不過據一城擾數縣大兵一合隨卽聚殲其伎倆胆氣不過如此從無遠

竄數百里之外者今晉省之設防專爲山東之教匪東西對衝則遼州潞安各口實關緊要遼州以黃澤關摩天嶺雲頭底爲要黃澤摩天皆天生奇險數百人守之卽不能飛越雲頭底在清漳河岸寬平難守越一嶺而南卽黎城之東陽關道路寬廓無險可守東連涉縣武安再東卽磁州邯鄲永年與賊之所在相近矣此關爲往來大路非守以重兵不可迤北則和順與邢臺接壤皆崎嶇小徑地不當衝迤南則壺關陵川與衛輝接壤亦皆山僻小路再南則太行之攔車鎮係通懷慶大路然揣度此時賊勢似不能及此亦須屯兵數百以張聲勢愚鄙之見竊以爲防堵之策虛聲固在十之六實際亦須十之四兵力太單則膽不壯心不固聞警卽走焉能堵禦若待風聲緊急而始議益兵則往返動須數旬比兵

集而賊之入境久矣尤要者則帶兵之將弁必須擇其勇幹忠實  
真不惜死之人此在高明自有定見何俟鄙人之曉瀆惟賊之遠  
近虛實全憑偵探的實時時得信方可抽添調度預爲之計向來  
坐探委員皆借別省官封此最誤事不但遲滯停閣不能速達且  
坐探之處賊或竄到則驛站皆逃音信立斷咸豐三年賊已從風  
門口竄至絳縣而省中茫然不知哈中丞在澤州亦不得信可爲  
殷鑒弟在上黨時曾差劉福星赴連鎮坐探沿路安設步撥每撥  
安健步兵丁一人以五十里爲率於安撥之小店插一紅旂爲記  
連鎮至潞安七百餘里三日必到每日到一報單賊中情形日日  
知之後移至高唐州馮官屯皆如此嗣聞河南賊氣甚亟又差紳  
士武來兩赴汴梁坐探沿途安步撥汴梁至潞安七百餘里隔一

黃河而三日半必到計每月不過多費數十金耳但所差之員弁必須明白曉事之人佐雜中張皇喜事者斷不可用武弁中如劉福星者機智膽量絕不可多得頃任澤州都司閱兵案內降爲把總不知現在何處可致信南鎮蒲協查訪士爲知已用當可招之來也一得之愚敢以爲獻

覆陽曲三紳士書

昨接公函聆悉壹是大憲爲完全公事費此紆籌紳士出名遞呈有何難事但愚鄙之見竊以爲尙有可商者請以管見所及爲諸兄縷陳之晉省前後捐輸已至五六次數逾千萬防堵所需捐補之費僅二十餘萬以晉省所捐之銀辦晉省防堵之事若從前年捐項內奏明劃出歸補計無不允中丞前在關中卽係如此辦理

惟爾時應行捐補之數局中尙未算出而部中撥餉之文星飛火迫所捐之銀隨解隨撥毫無餘剩今卽欲如此辦理亦已無及其不得不再行議捐者勢也所議就附近省城五屬捐輸亦甚公允然五屬之中其較爲有力者不過太原之祁太榆徐汾州之平介及忻州耳此外皆貧瘠之區涓滴之資無裨大局此數大縣自前年勸捐上年始得歲事雖復捐有成數然竭蹶亦已甚矣今未隔一年又有此舉且且伐之似乎操之太蹙難於應手此事之宜商者一也紳士半皆受恩之人與官府義同一體不特任勞不敢辭卽任怨亦非所恤惟三晉富民吝於財而怕官乃牢不可破之風氣至親密友貸十金且有難色一胥吏挾持之數千金立卽解囊此種情形皆諸兄所深悉頃者癸丑之歲弟在五臺勸捐費無限

唇舌所捐不足二千金後在省垣郭小帆方伯屢奉寄諭與弟會辦捐輸一事弟致信通省各屬紳士亦均立局勸辦然游疑觀望迄無成說大縣如太谷紳士勸辦兩月不足四萬金後見其勢不行乃與小帆方伯相商請吉履菴太守親赴所屬各縣督辦五日之中而太谷已捐九萬餘金隨至榆次祁縣亦俱捐有成數此紳勸不如官勸之明驗也晉省勸輸已辦多次其慨然樂輸者幾人皆印委各員以威權壓勒之乃能幸而集事畏官而不畏紳人情大抵如斯今此舉若自紳士發端彼必謂紳士不能捐而賣鄉黨以討好人人懷與紳士爲難之心必且決裂乖衡致成笑柄弟亦知大憲之意不過藉此一呈爲引線之計並非欲委其責於紳士然發端自官則彼雖悄悄含忿而無可如何若發端自紳士則彼

梗令有辭非徒無益而又害之矣弟係受恩深重之人平日粗知大義並無要譽鄉黨之見然本地民情知之頗悉此事之不敢出名者誠慮有損無益有發無收致令奏案或成反汗反無以對大憲也此時各直省尙不聞有已辦報銷之地大約皆不肯爲天下先晉省因奏明軍需局改爲報銷局勢難曠日持久然此二十餘萬金似亦尙有辦法不必專恃捐輸一途弟局外之身不敢置喙如必須以捐輸彌補似可奏明以此項奉旨不准開銷擬就五屬勸捐籌補惟太汾各大縣上年甫辦捐輸爲數甚鉅此時再行接辦各捐戶難免竭蹶請俟至咸豐十年再行勸辦則民力稍紓可以集事庫款不致無著其措詞自可由大憲主意似不必牽入紳士致啟捐戶觀望之心一得之愚未知有當與否祈卽將此信呈



之府縣請其轉回各大憲以備參酌是所切禱

致瑞五園廉訪書

卯歲并門一別忽已五年雖每歲往來省垣爲必由之路而無衣冠無僦從且旅店湫隘恐辱長者之車轍並寒暄之牘亦引嫌不敢輕致疎慢之訾知必見原於格外也頃諭柏垣坐晉樾蔭彌闕身在幃毳之中心切軒輦之效喬雲遙企頌祝維虔弟主講平遙書院倏已五年老病之軀日形衰憊在館中閉門却掃批改課文之外以殘書數卷送此流年今春大病之後氣體益覺支離明歲科場完畢將辭館北歸在家鄉附近設館以免車馬之勞頓作接本縣余小欄父台來信並抄寄新奉捐輸部文暨省局札行內有曾任督撫司道在籍之員一體竭力捐輸等因弟後來雖改京卿

旋即罷議而外任十餘年曾歷撫藩臬道受兩朝深重之恩當國家多事之日毀家紓難分所當然惟弟雖外任十餘年而所任皆極苦之缺辦公之外家中並未置有田產幸蒙恩點放四川試差歸田後始得苦蓋數椽爲棲身之地否則並此無之故前此歷次捐輸敝同年陳勿齋中丞武次南方伯皆捐銀一千兩而弟獨分釐未能報効卽前此在潞澤督辦防堵二年資斧不能自備尙煩局中每月支給薪水銀六十兩此種備細情形皆大公祖所目睹世上未有如公貧未嘗不自悲自笑也現在時勢孔亟益非從前之比凡有血氣誰不矢涓埃之報而弟則無家可毀既貧窘不能措貸有軀可捐又老病不任金革在平遙主講五年館俸每年二百四十金不足供家中食指祖遺微薄之產年來折變供餐亦已

殆盡今欲勉竭些許惟有將皮衣兩篋盡行折變然所值不過三百金且旦夕未能出手查歷來大員捐輸從未有二三百金之事且查部文此款係另作專款奏報並不歸捐輸大案之中若將此數入於專款奏案實覺詔異且慮此端一開力能多捐者藉爲口實反於大局有礙展轉徬徨無以自處方伯向未通信未敢冒昧奉瀆惟大公祖夙嘗共事知管仲之貧者無如鮑叔生平口不言貧至此山窮水盡之秋有不能自諱之勢伏乞將弟此函轉致方伯暨局中諸位便中婉回中丞討一示下以便回覆余令不致令其爲難冒昧奉瀆伏冀鑒原

覆保慎齋廉訪書

頃見閱邸抄者云閣下有請假之事意甚懇切閣下毅然丈夫且

旂僕甫受新恩豈有託疾避難之理此在庸人且不肯矧奇男子如保慎齋而肯出於此路遠無從訊問今於八月十一日接七月初一日所寄手書乃知在延平吐血將危恐誤緊急軍情送印於趙觀察疑懷爲之頓釋時事亦孔急矣國家當屯否未濟之秋正臣子捐糜圖報之日閣下力疾從戎心安理得即使馬革裹尸何媿烈士弟聞之不禁且喜且悲也弟生平自命不願爲碌碌具臣然學識疎拙辦事不合機宜聖主憫其愚戇改補京卿壬子年上三漸宜防一疏老生常談何足採錄蒙聖主降旨褒嘉殊批有置之座右之語外吏久荒筆墨未經考差蒙簡放四川正考官自聖人御極以來知遇之深誰如弟者不料天奪其魄神智日昏軍臺官犯何士邠在獄脫逃例應卽時具奏乃以正在交卸之際未及

出奏又未將此事告知後任懸閣二年之久樞部據實嚴叅不特  
自于嚴議並連累兩署後任深爲愧悚被議奉旨之後部文一行  
計算時日中途卽可赶上不待入閣聖意憫其年老糊塗虛其中  
途折回閣中逐出無顏歸里曲予矜全恩旨准令闈務完竣傳旨  
革職天心在已轉之時愚人無承受之福罪議之後猶煩天地父  
母俯賜生還怨艾之下泣血椎心歸里後家徒四壁正擬設帳餉  
口而適值粵賊北竄晉省戒嚴本省大憲奏令幫辦坊堵首尾三  
年雖馳驅山谷殘喘已不能支而仰賴聖主洪福劇賊總未西犯  
兵未血刃何功可錄恐雁汀中丞念其微勞或露乞恩之意因具  
啓再三控辭非矯情也當君父宵衣旰食之時非臣子希恩倖澤  
之日在別項紳士不可不加以鼓勵弟受兩朝重恩豈宜如此使

果精力未衰尙堪自効何妨自告奮勇求赴軍營乃蒲柳之姿未  
秋先萎在潞澤巡查山谷染受風寒動卽嗽喘不特不能乘馬車  
行一二十里卽頭暈不支營中著此無用衰翁豈不累乎且性情  
綏懦赴機不敏頃在閩中辦夷務以此獲咎勞聖主之訓飭兵行  
安危間不容髮若以迂緩應之何事不誤以此切切懇求而雁翁  
仍以無頂帶具奏致蒙五品頂帶之賞北向叩頭泣不能仰撤防  
歸里之後遂設帳於平遙一則醫疾一則以所得脩脯供八口之  
衣食此弟數年來所歷之情形也目下大河以南直抵滇黔徧地  
黃巾無百里安靜之士又值兵餉匱竭設措維艱凡有血氣莫不  
枕戈寢甲効命疆場仰屋籌思規畫兵食惟弟受恩最重受知最  
深乃以獲咎之故轉得置身事外偃息林泉局外之人多以塞翁

失馬相慶弟每聞此言寸心如割伏念氣力衰殘不任金革賞以  
差使已不能當畀以章服亦不敢受五官業已半廢四肢將近不  
仁惟此熱血未寒寸心不死心中有欲吐之數言關係安危大計  
此言朝達宸楓夕依秋柏毫無遺憾惟廢員擅遞封章有干例禁  
雖蒙恩賞給五品頂帶倘恩旨准其條陳事  
件並此銜亦不願受並非監察給事等銜仍是  
庶人若求本省巡撫代奏未必不肯然既蹈不安本分之嫌雖有  
至言聖主亦難採擇欲効一喙之忠竟無上達之路常慮溘先朝  
露匍匐宣廟門外或遭呵叱不得碎首玉墜之前萬至此不覺  
失聲大慟五夜  
思之往往椎心泣血邸報從不敢借看一看卽展轉終夜目不交  
睫山木自寇亦復何補涓埃故惟以批改課文學吟詩句爲消遣  
之具不知者或以日暮途窮筆耕求活爲可憐之貧宦又或以不

知黜陟不聞理亂爲林下之高人而不知其心頭眼底有死不瞑目四字念念不忘也因閣下盡瘁巖疆得盡臣子之分又係知我之人觸動滿懷心事故不禁揮淚一吐春崖制軍向未通信然臭味相同卽是聲應氣求正軒中丞任海疆重寄正當軍務倥傯弟不敢以賀喜之俗語相瀆祈閣下將此信鈔兩紙分呈兩院臺灣孔二翁亦知我者亦祈鈔一紙寄之閩中故人如有問弟者祈亦以此信示之俾知垂死孤臣所恨不在飢寒也閣下軍務勞神祈強飯自愛食少事煩古人所戒保有有用之身庶可酬高厚之德伏惟珍衛不宣

覆吳思澄比部世兄書

客歲病中接到手書讀之俯仰悲懷屢欲作答而擲管卽觸動心



事病氣隱隱欲發輒復中止惟有緬想風猷時殷洄溯耳弟賦性  
慙愚不諳世路頃在史館足不履津要之門踴涼酸腐人皆目笑  
乃受宣廟特達之知擢守潯郡不逾歲而分巡延建旋值先師文  
節公持節來閩獲隸宇下先師察吏嚴明屬吏皆斤斤救過獨弟  
與劉莊年馬社齋遇事好斷斷力爭辭氣不平殊失事上之禮先  
師不加督過而嘉其有守首以三人登之薦牘後在閩藩任內偶  
著瀛環志略一書甫經付梓卽騰謗議先師獨加褒贊囑令再加  
修飾鈔繕進呈旋因夷人租屋一事堅守成見不敢啓釁邊隅遂  
致彈章迭上萬矢環攻獨先師以所辦爲是手書諭令勿搖適當  
先師督滇入覲之際曾於朝房廣衆之中力爲剖白獨存公道後  
在太僕任內上三漸一疏先師自滇南萬里寓書深加慰勉蓋望

其努力自効稍補前愆不料蜀差甫竣遽爾罷議歸田計弟生平  
狷隘自好人皆目爲迂愚其受知最深者獨先師一人耳生我父  
母知我鮑叔每一念及不禁淚滴心頭也頃聞漢上星隕於里中  
爲位而哭蓋不特志竭身殲抱無窮之慟而乾坤正氣從茲乏楮  
柱之人其關係豈止湘漢片土已哉弟自壬子歸田次年卽值粵  
賊竄擾河北爲本省當路諸公所牽率奏令幫辦防堵在太原一  
年在上黨二年日衣短後與健兒雜處賊未西竄口隘幸得瓦全  
丙辰冬月撤防始得以白衣歸里家貧無以餬口適平遙人延之  
主講遂理寒氈舊業擁皋比者忽忽又三年矣以無用之人處無  
事之地破書環榻日日與筆研作緣粗飯寒齋淡而有味天之所  
以位置庸人者不可謂不厚惟君師知遇之恩百未酬一五夜思

之不禁汗下耳上年因聞海運短絀京師乏糧旂人有投河自盡之事轉思轉懼遂致嘔血發狂幾於不保所傳籌運西米策略卽係病中所書不料陸侍御竟拾爲摺料病愈後平心思之事本不易行無怪農部之議駁且不在位而謀政揆之素位之理亦大相刺謬山木自寇無味已極且令不知者疑其無端躍冶冀然死灰更爲可恥以此深自咎悔絕口不談時事邸報亦從不借看腹中芒角不生神魂差得安帖但祝江淮早就削平得爲太平之老學究以終餘年於願足矣生平於八股一途本有結習雖荒疎多年文課尙能批改兩年來從學漸多遂以此爲專務逐日丹鉛狼籍手不停揮暇則流覽古書間作小詩自娛打油釘鉸不復計其工拙也弟今年六十有四鬚髮皓然上齒全豁素有嗽喘之症近年

更甚一遇寒勞卽喘不可支常數月不出戶庭靴帽從不上頭足  
冬烘面目已不刻畫而自工矣頃因無子繼一堂姪爲嗣年甫十  
三讀書資性中平本有一女年十四而殤上年忽又生一女室聞  
呱呱之聲以爲祥瑞詠陶公弱女非男之句聊以自嘲因承雅念  
瑣泐以聞先師文集年譜如刻成望寄一部卽交勿齋同年處轉  
寄爲安

致劉玉坡制軍年伯書

壬子六月少司馬車一圓先生寄到手書適遇姪放四川考官曾  
泐一緘託其回寄四川差竣旋卽呈議歸田苦乏鴻便無由再寄  
尺書惟詢之山左來者知尊體康強如常仍以漁釣自娛頃閱邸  
抄知應召入都以三品京堂候補深佩所處之是素稔高懷雪淡

豈尙繫情纓冕惟值兩聖垂簾雲開見日我輩受先朝深重之恩  
當國步回艱之日既承恩命必應有此一行至年力之能否供職  
朝廷自有明鑑近晤傅馨泉世兄知己引疾歸來出處之間毫無  
遺憾欽佩之至本年查辦四品以下廢員賤名亦在鈐出之列奉  
部文調取引見何嘗不願望見闕廷一傾血淚無如嗽喘頭暈之  
症不時舉發斷不能任車馬之勞又升降階級需人扶掖日落以  
後非杖不敢移步此豈可以入禁門登殿陛哉不得已具呈懇英  
香岩中丞咨部以病體調理稍痊自行請咨赴部英中丞已代爲  
咨部矣非欲居恬退之名力不從心無如何也上年四月間英中  
丞奉到寄諭以捻匪竄入關中飭卽親赴蒲解防堵仍與紳士徐  
繼畚趙德轍田雨公會同籌商布置一切以期萬全等因明知精

力衰頹神智昏短不堪任此而既奉簡書又係捍衛桑梓義不容辭亦不敢辭英中丞奏明以太汾平三府沁霍隰三州並關北之忻代兩州團練相委旋值擒匪退散回匪臨張三輔千里半成焦土而甘肅回民處處揭竿成燎原之勢汾州西界之四州縣古之西河郡正當其衝英中丞調集兵勇咨令姪統轄此軍隨時調度姪以衰驅不能馳驅山谷舉永甯之李子廉鎮軍能臣臨縣之張子雲協戎從龍介休之李東樵守愚侯春坪禧昌兩戶曹作爲幫辦又汾州通判王春埜韶光者奇士也昔年英夷攻廣東省城三元里起義兵截殺夷兵數百並夷酋伯麥卽係春埜首事以此破三十萬之家僅得一通判投閒置散二十餘年年已近七十矣姪知其能舉之爲沿河團練總辦英中丞據以入奏俱奉俞旨李張

兩君皆身經數百戰之宿將適皆罷官家居其家又皆在黃河東岸因以防堵一事屬之兩君沿河團練屬之王春墊腹地團練屬之李侯兩部曹自上年秋冬辦起迄今將及一年矣黃河天塹可恃而汾州西界峻嶺重疊多一夫當關之地晉省除大同歸化城外別無土著之回民可以勾結窩聚故尙得幸保無事然秦隴之患未平總不能放心也姪自丙辰年主講平遙書院習靜成懶衰軀益形孱弱自上年辦理團防文檄旁午曉夜籌筆心血幾於耗盡而事體毫無把握徒惟是山木之自焚几案之上文檄與課卷並陳講堂之中冠裳與生徒雜進以村學究而談兵以冬烘先生而乘郭正如支道人之畜馬識者且嗤其不韻也十八省無不殘破僅餘此一片土尙稱完全正供年清年款捐輸已至七八次尙

能勉措京外要餉皆取之於是朝廷倚之爲命脈屢飭閩外諸大帥悉力保護山西不准有分毫損動故勝多兩帥皆從背面擊賊不敢以晉爲壑晉省賴此尙得瓦全耳多帥勇果能軍仍是索倫本色無諸帥巧滑習氣自入關中轉戰將及一年勦戮回匪不下數萬其巢穴悉行攻破回匪之勢已微而川匪蓋二順一股近日由興漢竄入商雒距潼關不遠晉省之蒲解一帶又形喫重叛將宋景詩自勝帥逮問之後率其潰勇持多帥僞札渡河由稷山絳州北上以奉令回籍爲名其時順逆未分腹地無兵不能邀截地方官不得已助以資斧催令出境沿途尙無放火殺人之事而淫掠騷擾在所不免其潰勇各纏腰囊沿路逃散東歸出晉境時所餘不足千人直東無重兵堵剿聽其歸臨清巢穴近聞已築兩大



寨招納亡命數萬公然叛逆意圖大舉恐其被勦西嶺晉省虛實已爲所窺東南之防又形喫緊此敵省現在情形也晉國之強自古稱之李唐及後五代猶然近數百年來專於商賈之利習爲南方之強其良謹易治天下殆無其比而其怯懦無膽天下亦罕其倫現在之辦團練不患有別省之流弊如抗官抗糧等事而亦斷不能收別省之近功如豫東等省之聯莊擊賊但期於彈壓土匪稽查盜賊猝有風鶴之警不致忽生內變而風聲所布外寇亦不敢視爲無人之境卽此淺效已非容易若欲化弱爲強使之同心敵愾豈旦夕之功哉所幸朝廷清明年歲豐稔瞬交上元甲子或可出屯傾否漸次削平得爲太平之老學究了此餘年亦幸甚矣姪自壬子年四川差竣罷議歸田次年卽值粵匪北竄爲中外諸

公所牽率在省垣辦理團防勸捐等事旋值髮賊竄入晉境屠曲沃平陽由潞安竄入直隸恆宜亭中丞奏令督帶兵勇回五臺防堵要隘甲寅春間恆中丞復奏令督帶兵勇防堵遼潞澤等處恆中丞去繼之者王雁汀中丞氣味尤爲投合駐上黨將及二年乃撤防歸里家徒四壁不得不以研食餬口省城紳士欲公薦主講晉陽書院厭其應酬之煩堅謝不就適平遙官紳敦請主講遂就其館此館由紳士延師不由官薦故樂於就之自丙辰春間設帳平遙至今已八年矣閉門謝客恆三四月不出館門故人偶有枉顧者亦不報謁數年中共事之文武員弁或以寒暄信來一概不答邸報亦不借看冠靴雖設輕易不上頭足多年外吏筆墨久荒惟壯年困禮闈者十三載於八股一道嘗耗心血重理故業尙有

端緒可尋每命一題輒草一篇示式出之甚易一兩時可以脫稿惟踏淡無華不能爲臙脂牡丹耳無一日不搦管無一日不展卷雜著甚多懶散不自收拾又學作雜體詩打油籬桶聊以自娛亦不求甚工如是者六年爲老年來最適之境每歲束脩三百金外課約三百餘金在家鄉虛負文名又舊銜貴顯諛墓祝嘏之文求者頗多遵古名人賣文之例收其謝儀每年所入約共八九百金自供餽粥之外大半爲劉父所攫亦不以爲意由西川歸來差囊得四千餘金乃得苦蓋數椽爲藏身之地又買地十餘畝爲埋骨之所先葬亡荆令驅狐狸餘悉俵散宗族無所留遺惟以筆耕供食指親丁止數口亦尙不憂凍餒在閩所生長女已字忻州張氏年十四忽以痘殤生育之事亦已絕望丁巳七月在閩所購之妾

馬氏忽又生一女未彌月卽出天花三粒現已七歲狀貌似男孩教以讀書認字亦極聰慧惜乎其櫛而不巾也其母夢松根生芽而生名之曰松芽膝前有此借以破悶已許字定襄梁蓉洲進士之幼子嗣子樹卽堂弟繼堦次子過繼時年六歲交兩妾撫養之十五歲娶婦今已十八讀書資性頗鈍五經左傳甫讀完現今讀史漢唐宋古文及小題明文上年初試作時文心思筆氣尙可用但穉嫩不成片段耳八歲上學延師專教之本族頑童一概不令附學亦不許無故出大門故一切敗壞習氣尙無沾染性愿厚不解與人爭競論者以爲似姪移花接木理或然也其廡生尙未及歲卽及歲亦不令遽考文理如通令下大場亦不望其必中但望其明白通理能立人品守得數卷殘書延接先人香火足矣其婦

亦婉順日望抱孫尙未得也聞傳馨泉世兄云貴鄉亦遭兵火寶  
眷分居數處浩劫懷襄關乎天數長物不足惜丁口無恙卽爲至  
幸聞所得之少世兄年已十三貌端秀而資性聰明讀書天分過  
人間之喜甚足見天道之未始不可憑也姪乙卯年自上黨歸來  
身體已衰憊不支做漢書陀傳五禽之戲並後來諸家一切軟功  
集爲養生雜說擇其可行者立爲功課每日早晚行之八九年來  
未嘗一日間斷故手足雖無力而尙不至跛曳耳鳴已十餘年尙  
未重聽眼雖花而帶花鏡尙能作小行書所服丸藥純乎溫補故  
七八年來尙能出門教讀藉以餬口日暮而途未窮專賴乎此但  
不能銜寒冒暑任車馬之勞耳平介富家所識不少除其子弟從  
學致送束脩外從無通融借貸之說聞中故好間有以綈袍寄贈

者亦從未向其言貧回首生平一錢不值惟名節二字留以蓋棺不敢再有玷污究竟亦不過一自了漢而已今年七月感時疫大病兩旬自覺精神銳減本欲辭館北歸在忻州設立散館現爲團防諸事所牽猝無脫身之法頃年故友武聽濤大令來兩自四川寄來花板一副在館中做成上年王文勤公薨於汾州借去用之其世兄補還一副又已做成壽衣則均已做好另一小箱收之竟似遊客之收拾行李待時而發者昔裴晉公有言曰豬鷄魚蒜蓬着便喫生老病死時至則行未嘗不歎其器抱之宏達老年人於生死關頭往往未能看破者皆言世事未了心事未了殊不知世事心事百年亦無了期一旦撒手則無不了矣諒高明亦以爲然也詢之傅世兄山左諸同年得其大概莊年年七十九尙健在前

二年曾接其手書尙喜填詞石琴家遭兵火居宅被焚掠人口尙無恙惟鹿春如寄寓蘇杭多年未通信不知消息屈指生平寅好遭劫數者十之七八平善收塲者十之二三亦已大半宿草我兩人本無漏網之理乃以罷官之故轉類塞翁之失馬徬徨四顧海內交知落落僅餘數人亦可悲矣因傅世兄處可以寄書撥冗作此長箋聊以當一宵秉燭日近西崦彼此鐘漏將歇不特晤而無期卽手書往來能更得幾回以今日之絮煩補他年之默息固宜其刺刺不休也傅世兄少年老成其才具明敏開朗而心思沈細能向實際追尋將來有守有爲必爲山右循吏足徵秋屏同年之家教現已頂補云補缺後擬卽迎養倘能與秋翁一晤亦苔岑一段佳話也

致孔雲鶴觀察書

戊午嘉平初七日接奉閣下與子厚三兄公函藉悉蓋勤近况深慰遠懷旋得榮晉臺澎觀察之信爲之抃舞七鯤片土又可得數載綏安不特爲臺民喜而兼爲閩民喜也時事方艱正當出屯傾否之際閣下已受重恩萬無請退之理昔任尙問班定遠以撫夷之道定遠告以蕩佚使簡易寬小過總大綱閣下治臺正得此意往者臺地每隔數年輒有變故固由民情浮動亦半由在事者必求飽橐兼欲邀功入苙而招恆所不免閣下鎮之以廉靜五六年來臺地遂安如衽席乃知迂拙二字是治亂持危之要訣也弟前年因憂時感事驟得痰迷之疾病中作籌運西米策略一書聊舒鬱結並非必欲上聞乃好事者傳入都中言路遠拾爲摺料得旨



交部隨經部駁事後思之其事本不易行且與聖人不在位不謀政之訓明明違背血性二字一發而不中節卽已參入客氣敝鄉大劫已過此時爲倚柱涼州本是老學究幸復其本來面目有南北來人亦不復探問時事消息入此歲來攬鏡自照面貌加豐頰頰且泛紅色殆莊子所云不材之木得終其天年者歟弟在敝鄉虛有文名兩年來生徒日進課卷手不停批如掃落葉以此餬口不敢憚勞每拈一題一時許可成一藝嘗有句云八口依然仰硯田敢嫌脩舖太羹羹從前愧煞雙鷄膳日對流亡食俸錢蓋實錄也前年所生幼女上年歸里始見之肥白如瓠鰾跳異常已出天花尙當易養咏陶公弱女非男之句聊以自嘲此後尙未得雄然弟早已付之度外人力旣盡有與無聽之而已今因鴻便特寄此

函翹首東瀛依依如結

致張詩舲總憲書

甲寅春仲在里中奉到代柬詩篇因將赴上黨行色匆冗又素未學詩不敢奉和然汪倫送我深清未嘗一日忘也上年晤柴鹿厓吉士傳語致詰甚爲媿悚然以疲癯放廢之人猶煩大君子拳拳致念不見錄於時賢不足憂不見棄於有道又未嘗不自喜也弟自甲寅赴潞澤乘郵將及兩年乙卯冬月撤防乃獲歸里次年卽設帳平遙擁皋比者忽已三年殘書數百卷堆几環榻小窗展卷心眼開明廿餘年驚悸殘魂漸歸軀壳敝鄉已過紅羊此時爲海內樂土以無用之人處無事之地天之所以待庸人者不可謂不厚私例生徒之外不通賓客冠蓋偶有過從亦來而不往故人寒

暄札牘概不作畚嘗有句謝之云賣菜詎煩公府掾種瓜休說故  
時侯又歎老有句云短髮自憐知白早衰顏只爲洗紅多皆實錄  
也頃欲以餘力治古文自揣精力已衰不能成體亦遂廢輟素好  
地理之學嘗撰兩漢郡國今地考略一書甫成幽并涼三州因館  
中課卷猥集竟不能卒業弟中年困於禮闈八股一途頗耗心血  
近又以此爲代耕之具見獵心喜時有所作敲門之磚已拋復拾  
良爲可哂然村學究事業不過如此附寄拙刻時文二種以博一  
粲素不爲詩因欲和大作偶動吟哦之興二三年來時一爲之既  
逾達夫學詩之歲又值文通才盡之年釘鉸打油不敢就正大雅  
僅以和作二首錄呈塞責而已大箸詩集續刻必多便中望寄一  
全部所謂雖不能至心嚮往之也時事方艱平章重事將賴潞公

努力加餐

致薛覲唐少宗伯書

秋間奉旨陛見蒙恩在總理衙門行走託章京沈君在城內租宅承兩琴世大兄以尊宅西畔空院相假得以安頓眷口並借以儿榻什物既遂枝棲之願兼慰買鄰之思私衷莫名感鑿曾託世大兄於竹報中附筆致謝想已達矣弟自壬子年在珂鄉試差事竣旋以閩中舊案鐫職歸里後值髮賊竄入晉境爲當事諸公所牽率幫辦捐輸團練等事復督帶兵勇在上黨防堵撤防後乃設帳於平遙筆耕糊口首尾十年已成冬烘面目元年查辦廢員雖蒙鈐出調取引見而自顧衰庸斷不作出山之想不料本年閏五月間忽奉陛見之旨不敢復辭勉強扶病入都遂入此無了休之局

年逾七十乃復作春夢婆知必爲海內高人所笑恭邸知其步履之艱奏明不遞膳牌故尙得勉強供職然一經補缺驗放月官等事卽不能免特以甫受恩命不敢遽出求退之語西崦暮景能得幾何至不得不退時亦無可如何矣各國夷情尙無大變而小波折時時有之幸同事諸君子熟習夷情知其肯綮就事了事暫可相安至欲求一勞永逸之法則茫無把握知關蓋念瑣泐以聞

松龕先生文集卷四

致武芝田觀察論縣名及縣志書

大刻試帖署名之處曰崞陽似不如直書崞縣之爲妥崞縣原以崞山得名隋地理志唐元和志皆載之然秦漢之崞縣繁峙皆雁門郡地乃今之渾源州其地有崞山在州西北二十里漢以此山名縣後魏書太平眞君二年葬惠太后於崞山水經注崞山縣右背崞山渾源州舊志有橫山在州西二十里南北橫亘如城郭故崞縣在其左卽故崞山云此漢地理郡國兩志之崞縣以崞山得名者也今之繁峙崞縣乃後來所移建繁峙在漢爲後人鹵城兩縣地後人屬太原郡鹵城屬代郡今之崞縣爲漢原平縣屬太原至元魏分爲石城原平兩縣隋改爲崞縣唐又分爲崞縣唐林兩

縣因而隋書地理志云崞縣有崞山元和志云縣因山爲名夫山川同名者多崞山原不妨有兩然渾源之崞山係兩漢所名今崞縣之崞山乃隋唐所名署曰崞陽則不以縣言而以山言考古者以兩漢在前且疑爲渾源州人矣若探其本而署曰原平閱者更不知爲何地故名人著書之例稱今名不稱古名稱古名且不知爲何代人不特此也五臺漢之慮虢縣屬太原郡城西十五里有山曰慮虢下有王村出泉流成小河曰慮虢河繞縣城之西北東南流入縣河慮讀如閭虢讀如夷後五胡迭據不識華字元魏訛書爲驢夷齊周皆因之至隋大業初乃因山名改爲五臺縣唐宋因之至金源已據半壁貞祐四年升爲臺州元因之明復爲縣國朝因之乃五臺人署款或稱古臺州而縣署亦榜曰古臺州以

隋唐爲近而以金元爲古每見之輒爲胡盧又定襄人好稱晉昌亦非是今之定襄漢之陽曲太原郡地漢定襄縣在陰山下與今歸化城相近漢定襄郡治成樂今托克城和林格爾一帶拓拔氏創業於此改曰盛樂水經注言之甚悉當漢獻帝建安二十年雲中定襄五原三郡爲匈奴鮮卑所擾男女百餘萬投入內地時曹操當國乃僑置定襄五原雲中三縣於陽曲立新興郡以統之卽今忻州至晉惠帝時改縣名爲晉昌元魏旋復爲定襄建安在晉惠前數十年仍是漢名五馬渡江晉昌之名旋廢今不稱東漢所置之定襄而稱旋立旋廢之晉昌不可解也又忻州人好稱秀容亦非是五胡亂華倡於漢之劉淵淵生於今之忻州人皆譽其儀容之秀偉割據後自美其名因名其地爲秀容元魏遂立秀容郡



實卽漢末之新興郡故陽曲縣地也與其稱元魏之秀容何如稱東漢之新興因有秀容之名世俗遂謂因貂蟬而起令人噴飯又代州人好稱代郡不知漢之代郡乃今之蔚州今之代州正漢之雁門雁門郡治本在善無又移陰館三國時魏移廣武皆在今雁門關外自魏迄隋皆稱雁門郡五代趙宋因之金元明則專稱代州雁門之名遂隱史記趙世家趙襄子之姊爲代王夫人襄子北登夏屋請代王使廚人以銅料擊殺之因并其地夫人泣而呼天磨笄自殺代人憐之所死地名爲磨笄之山在今雁門關外是當日雁門一帶本趙地非代地兩漢分立郡縣以代郡隸幽州以雁門隸并州今之代州實非古之代郡竟無知之者矣每見介休人好署定陽極爲可笑介休之名最古兩漢分界休卽縣平周三縣

魏晉分介休鄆縣兩縣元魏分平昌介休鄆縣三縣齊周爲平昌縣隋復爲介休縣歷唐宋金元明不改國朝因之定陽之名雖見於隋書注而其盛稱則創於劉武周不但不成朝代亦並不成割據與字文化及王世充劉黑闥之徒何異起事六年卽爲唐太宗所滅乃以其一時僭僞之地名污辱介休可乎此何異以莽新所改易之地名竄易漢志地名也推其緣起皆由士大夫好尙高雅而全史及志乘又未嘗寓目偶署款識以現在之地名爲俗因取縉紳全書各郡縣上所刻之別名以爲較現在之地名爲雅殊不知縉紳別名乃坊肆刻書者倩妄人爲之豈可據爲典要哉又見六朝至唐大族多稱郡名王則會稽太原李則隴西趙郡盧則涿郡崔則博陵鄭則滎陽以爲古人嘗有之此又誤矣族姓之說起

於元魏至唐而定爲七姓此七姓者互爲姻婭不婚別姓雖移居  
千萬里外而總稱其族姓始居之郡乃是一時風氣與後來之隨  
地著籍不同且其族姓皆兩漢古郡名無定陽之類也弟嘗讀兩  
漢書地名注云今某郡某縣以今日地名考之不符者十之五六  
非舛誤也章懷師古皆唐人彼所謂今以唐言也試取元和志核  
之一一脗合矣溇沱桑乾兩水皆注曰至某地入於河今兩水皆  
單行入海與黃河無涉則以唐時黃河尙從天津入海故兩水下  
游匯於河迨黃河南徙而兩河遂與黃河風馬牛矣以今日之溇  
沱桑乾而疑漢書注有誤可乎山西郡縣志弟所見無多省志亦  
不過集各州縣志而成因訛襲謬絕無可觀惟潞安府志沿革尙  
不甚舛誤文亦曉暢自係出通人之手苦太煩冗尙須刪節最蕪

者太原各志如唐叔虞之建國本在平陽之翼城不在太原而太原縣有古唐城此緣鄭康成一語之誤遂有先都太原後徙平陽之說然此猶古今所同誤不足深求最可笑者祁縣有鞞川云是王維別業按唐書王維及弟縉傳皆漏書郡縣而別書稱爲河東人則祁縣之說已不確鞞川在陝西藍田縣西安府志鞞谷水在藍田縣南出南山鞞谷北流入灞右丞鞞川別墅卽在於此本宋之問別業宋貶死右丞得之本傳稱鞞川有華子岡欵湖竹里館柳浪茱萸泔辛夷塢與裴迪日遊其中賦詩爲樂後捨爲佛寺卒卽葬其西少陵詩爲問西莊王給事西莊卽指鞞川距祁縣千有餘里何由縮地而移置之其餘如此類者不可枚舉正不獨訛子方爲好舛訛狐突爲胡塗也又唐代叢書載狄梁公裔孫惟謙爲

晉陽令因禱雨沈女巫郭天師於汾河登晉祠山暴烈日中頃刻大雨如澍不肯移步百姓歡呼擁之下州將奏聞璽書褒美比之西門豹任滿當去民不肯舍加三品服終於任如此表表新舊唐書竟不附見於梁公傳亦不入循吏傳而修陽曲太原兩志者鄉賢名宦皆不收則其採訪之疎漏可知三晉志書名作惟汾州府及汾陽縣新志出於戴東原之手景星慶雲偶然一見此不獨山右所無卽字內亦僅見其汾州府之舊志弟亦見之則前繪八景城廟圖俚俗與他處無異此外惟關中五志及陸清獻所修之靈壽志稱爲名作閩省之甯化志亦最有名弟好李寒支之文其全集嘗細讀數過此志亦出寒支之手各志小叙似廬陵五代史可稱奇作惟腹笥淹博不免貪多羊棗十之二三膾炙居十之八九

止可以奇文賞之非志乘之正體也五臺志多年不修邑侯余公與門人王西樓議重修欲弟主其事弟竟未敢任一則窮年研食無此閒暇衰老多病無此精力再則必不合衆人之意故不敢爲也五臺自兩漢以來爲太原郡之慮虜縣至隋而改名五臺沿革無多金元以前無可紀之人物其事似當易舉關中五志武功朝邑邵陽鄠縣郿縣朝邑邵陽太簡惟康對山之武功志繁簡合中陸清獻之靈壽志利病詳核意欲合此兩志成法核實爲之亦不過兩册已足然必將俗例相沿之八景圖暨天下所同之祠廟圖全行削去卽此兩端已不合衆人之意且舊志荒略已甚體例全乖創始者不知何人似於志乘體裁茫然未解卽如方外一門在別縣可有可無在五臺則爲至要邑以五臺山得名五臺山以文

殊師利道場得名宗門古宿見於指月錄諸書者甚多文益禪師  
爲五宗之一稱爲清涼宗內典多其所譯此外古德尙多節之皆  
可成小傳而志無之五代史東漢世家稱劉承鈞自失契丹之援  
地狹產薄國用日削五臺山僧繼容故燕王劉守光之子爲人多  
智善商財利自崇世頗賴之繼容能講法華經四方供施多蓄積  
以佐國用五臺當契丹界上繼容常得其馬以獻歲率數百匹又  
於柏谷置銀冶募民鑿山取礦烹銀仰以給用卽其地建室興軍  
拜繼容爲鴻臚卿至太師中書令卒追封定王弟按繼容於佛法  
不足道而其事迹則關係五臺山古今大局鈔五代史原文卽是  
絕好列傳做劉秉忠姚廣孝之例不必入之方外也而舊志竟佚  
其名其所臚列者則各叢林名目碑記不過鈔襲清涼志而已彼

釋典此縣志何可混而爲一卽欲存其名目倣朝邑志之例不過千餘字已無掛漏乃運篇累牘以禍梨棗何其不憚煩又載梆腔戲文出家之楊五郎豈不令閱者齒冷又藝文志所載清涼山詩多近代人作頗有打油惡札而吳梅村朱竹垞兩詩伯集中皆有清涼山詩梅村詩五篇尤爲高唱而志皆無有則修志者之見聞亦未免太狹矣至我朝祖宗三聖人屢幸五臺爲民祈福兼以撫綏蒙古六飛蒞止前後凡十餘次駐蹕回鑾之年月必宜恭紀多士迎鑾獻賦召試之詩賦題目取士之等第姓名必宜紀載而志無一語及之尤爲失其輕重至人物一門自明以前草草數人國朝張龍池先生理學名儒爲傳青主徵君畏友舊志有傳而鄭樂山太史劾喇嘛之橫恣擾民除積年之害志載其疏而不爲立傳



又知縣事陸公長華手縛典器喇嘛鎖納元旦窮治之事得上聞  
追奪大喇嘛提督印僅於地糧中每歲撥與香火銀二千兩草豆  
之供永遠裁革由是喇嘛斂迹縣民喜若更生至今家尸戶祝名  
宦傳中當首爲立傳而舊志無之今欲爲之補立而陸公之資貫  
已無從查考尤爲可惜鄉賢自張鄭兩先生之後可以立傳者寥  
寥惟先祖九江公之治北河宣防具有方略先君施南公之攝府  
篆立守望相助法川匪不敢入境一生窮研周易所著敦良齋遺  
書見許於當代鉅人先堂叔觀察公在直隸二十年歷河間五州  
縣復守河間遺愛在民口碑至今不衰凡此皆宜立傳然援例以  
求者必多一不應則謂私其所親嗷嗷怨謗徇其請則鄉黨自好  
皆太邱讀高頭講章者皆康成矣弟欲表揚先德自可勅之家乘

何必登之縣志以招闢取怒乎行將與邑侯及西樓商之如必欲弟任其事則請勿製其肘體例由我爲之勿令不曉事者旁參議論採訪委之衆紳落筆則獨任之不必設局卽在館中乘暇爲之兩三月卽可脫稿將稿寄回分手繕寫將來成書卽不敢竊比對山稼書爾先哲然與世俗之所謂志書者自當不同斷不至如舊志之荒陋可笑如必欲仍舊貫則何人不可爲弟不特不敢與其事亦斷不敢列名恐有識者見之謂其人薄有文名伎倆乃如此也又各州縣志之八景始於東坡虔州八境詩然境也非景也後人修志者規以爲例九則削其一六則湊其二五臺八景惟石窟躍魚頗奇此外則東冶秋禾槐陰春色山城夜月關道穿雲河邊歸燕龍灣煙雨茹湖落雁何處無禾何處無春色何處無月無雲

無雨何處不歸燕奚足爲景至於茹湖一小瀦旱則涸潦則有旅雁偶有翔集者亦可以爲一景乎弟所見各家志書從來無此圖今一概削去必不愜衆人之意夏蟲不可語冰故堅謝不爲也偶因大刻醇陽二字觸發一落筆刺刺不能止寫出三千餘字書訖不禁自笑聊寄閣下可當半日談劇將錄寄邑侯余公及王西樓商縣志事大刻醇陽陽字改爲縣字卽妥挖補甚易

致劉魯汀大令書

昨得書數千言承示平陽劉注之譌竄係以陽平誤作平陽並定襄地勢之大略疑團爲之頓釋喜躍不已郡縣之名起於秦前此地名小者山水城邑大者或指其片段言之戰國時自秦而外皆謂之山東是其證也尊論謂相州之平陽卽臨漳又云爲晉山東

地總名引證確鑿洵爲不易之論拜服之至中山國之唐縣注引張晏說謂堯爲唐侯國於此堯山在唐東北望都縣界今直隸保定有唐縣正定有行唐縣順德有唐山縣唐山距望都三四百里自無瓜葛望都卽慶都以堯母得名距今唐縣數十里然在唐縣東南非東北行唐在望都西南百餘里與東北之說似相合兩地皆與今之定州相近

古中山未知孰爲唐縣然總不離此一帶也今之唐縣行唐縣弟皆屢經其地沙瘠之土雜以岡阜以之作藩國固無不可然其俗與唐魏迥殊豐稔不解蓋藏饑荒則流離載道所謂唐魏之民思深者自是指山右之邦畿與舊國無涉也再中山卽鮮虞戰國策注謂因其城中有山故名今之定州在平土弟曾穿過其城不特無山卽並岡阜亦無之則非中山之舊址明矣

定州迤西數十里曲陽縣治之東漢之下曲陽平地有小山圍約一里餘高約半里疑古之中山城當在於此亦是臆度之說無所據也

致魯汀論戴氏汾州府縣志書

前蒙惠寄戴東原所修府縣志翻閱旬日粗得大略考核之詳確方駕顧胡其糾正前人錯誤之處尤爲精確不刊如云各郡首列之縣爲郡治前漢班志尙無此例皆前人之所未發又云西河郡治未徙離石之前郡治在河西河套中論亦甚確其論春秋初年霍山以北非晉有亦甚確當然以翼城之欒池爲晉水而抹煞懸甕之晉水竟若汾太兩府之地自周初及春秋迥非華土而與晉無涉者則與古籍皆不合鄙意終以閣下前函所論爲允另書所見呈政又六月詩之至于太原東原亦主固原州之說鄙意亦不

以爲然太原地名肇於禹貢見於周雅列於左氏外傳至秦置郡未之有改別地有同名者惟太原不聞今必廢古今所名之太原而鑿空取他州之地強命之曰太原亦未免好奇矣高明以爲何如

致魯汀論兩漢水書

前後漢地理郡國兩志隴西郡之氐道縣注爲禹貢養水所出養卽漾也郡國志注引巴漢志曰漢水二源東源出縣之養山名養南都賦注曰漢水源出隴西經武都至武關山厯南陽界出沔口入江巴漢志曰西漢源出隴西岷冢山會白水經葭萌入漢始源曰沔故曰漢沔今考兩漢水不特發源兩地而下游亦絕不相涉東漢水發源今陝西省之甯羌州俗名漢源山又稱五丁峽東流

入沔縣歷漢中興安鄖陽至襄樊折而南至潛江又折而東至漢口入長江漢口卽沔口也西漢水發源今甘肅省之秦州曲折至徽縣而南流歷略陽會嘉陵故道水入四川之廣元至昭化而會白水江古之葭萌也又南流歷閬中南充至合州而東會巴江西會涪江至重慶而會岷江東北出夔巫此江俗皆稱嘉陵江不復知爲漢水矣西漢之隴西武都漢陽三郡分跨今陝甘川三省犬牙相錯最難分晰隴西之氐道縣或爲今陝西之甯羌州或爲今甘肅秦州嶓冢山究在何處案頭無書無由查考論兩水發源之地相隔原不過數百里然東漢水自西而東至江夏入大江西漢水自北而南至巴縣會岷江相隔數千里風馬牛不相及其西漢水所經之略陽縣與東漢發源之甯羌州相隔不過百餘里然萬

山限隔絕無涓滴相通古載籍之所稱漢江者皆指東漢水漢之漢中郡今之沔縣沔陽州皆以東漢水立名卽考之禹貢導濟與今東漢水經行之道一一昭合惟前漢之天水郡後漢改爲漢陽郡當是就西漢水立名然與東漢水無涉也今郡國志注引南都賦注云源出隴西歷南陽界出沔口入江其爲東漢水明矣乃又云經武都至武關山武關山不知何指高祖入秦之武關在商雒一帶又有武休關在留壩屬俗亦名武關武都則今甘省之徽成階文一帶乃西漢水經行之地東漢水自發源之處至漢中自西而東何由西折而入於武都又注引巴漢志云隴西幡冢山會白水經葭萌入漢會白水經葭萌此嘉陵江經行之路其爲西漢水明矣乃繼之曰入漢嘉陵江由葭萌南趨閬中不知入於何處之漢若謂入於漢中之漢是倒流而飛越矣又



曰始源曰沔故曰漢沔考東漢水別名沔西漢水實無此名統觀  
注引各家之說總是將東西兩漢水誤會爲一故任意鑿空而不  
知不可通也壬子年出使四川泝東漢水而上直至發源之五丁  
峽入川界後又傍嘉陵江行數日適閱漢書郡國志注心疑其誤  
案頭無水經注禹貢錐指等書無可查勘敢以質之高明又考漢  
之武都一郡當是今陝西省之鳳縣留壩甘肅省之兩當徽縣成  
縣一帶武都郡有下辨章懷注謂卽鳳州今之鳳縣也又有沮縣  
注沔水出東狼谷又有故道縣今鳳縣以北有河自北而南俗名  
故道河此河至鳳縣城西流入嘉陵江即西漢水繞鳳嶺而南諸小水  
會合成大河南流出褒谷入漢沔即東漢水俗名烏江皆在北棧中南  
棧自沔縣西行入山沿澆水行二十里有沮河自西來會之俗名略  
沮河

路旁鐫石曰沮瀆合流疑所謂東狼谷卽指五丁峽漢之漢陽郡有西縣故屬隴西注曰蟠冢山西漢水則漢陽一郡似是今甘省之秦州伏羌禮縣西和階州文縣陝省之略陽鞏羌一帶隴西郡當是今甘省之鞏昌蘭州西跨岷洮一帶其所屬之氐道未知確爲何地然既注爲瀆水所出而漢陽郡之西縣下注曰蟠冢山西漢水則養水之爲東漢水明矣養水實出今甯羌州或卽漢氐道然以地形大勢揆之甯羌在東南似當是漢陽地不當遙隸隴西總之兩水發源之地相距原不甚遠謂爲同源而異流或猶可通謂爲異源而同歸則一在楚之東一在蜀之南乃說之萬不可通者也又禹貢蟠冢導瀆東流爲漢今東漢水實係東流西漢水乃南流非東流自虞夏至春秋戰國言漢者指不勝屈皆指今漢中

漢口之漢絕無一言及西漢水西漢水之名爲漢不知起於何時至漢武帝乃取維天有漢之意名其郡爲天水東漢則改名爲漢陽因而巴郡有安漢宣漢漢昌等縣廣漢郡有廣漢縣皆以西漢水立名也後人未溯原委竟以會白水經葭萌之嘉陵江而謂其下游入漢沔可謂怪矣郡國志廣漢郡有葭萌縣注引華陽國志云有水通漢川亦與巴漢志之誤同耳

題王月潭先生小傳後

吾師月潭先生歸道山已四十餘年矣哲嗣秋寶長余一歲幼同筆研數年咸豐癸丑余在井門襄防務秋寶出先君子所撰先師小傳相示囑書數語其後旋值鎮州告警五臺戒嚴余倉卒歸防臺口而秋寶於是年八月署平陽訓導城破借幼子殉難甲寅春

余赴上黨督辦防堵至乙卯冬撤防始歸則此冊尚在篋中也回憶丁卯戊辰間余與秋寶同學京寓讀史漢八家古文初執筆學爲八比文兩老人得暇互教之先君子爲批改文課講授經義則先師爲多寒夜篝燈高吟互奮恆至夜半先師臥而聽之甚以爲樂憶之忽如昨日事今兩老人秋柏數拱秋寶蹈白刃完大節墓草已復離離獨余後死而老病侵尋鬚髮亦皓然矣俯仰身世能勿慨然至先師品學之端醇先君子傳中已詳哉言之毋庸小子之贅述也書其緣起歸秋寶之賢子壽亭焉

跋丁長孺先生墓表

乙卯乘鄣上黨丁雙橋明府以劉蕺山先生所撰先德長孺先生墓表見示讀竟爲之三歎明至神廟季年陰長陽消將成板蕩東

林諸君子主持清議觚觸羣邪已岌岌乎不能勝至天啓而黨事起或死或竄或黜靡有子遺而明社屋矣論者謂危言於無道之日未合於明哲保身之旨然罡風浩氣足以撐拄乾坤烏可以尋常軌轍論之哉叢山爲明季理學正傳於人不輕許可而傾倒於長孺先生者如此則先生之生平可知矣謹書數語以志景行咸豐乙卯孟秋後學徐繼畬謹識

題劉玉坡制軍自立圖

立於山凹水曲漁樵之與侶麋鹿之與遊而公自恬然立於細旂  
廣廈棨戟耀其前鐘鼎羅其側而公自淡然立於萬仞之懸崖臨  
不測之深谿雷雨震撼奇鬼睽睽而欲攫而公自凝然立於穿漏  
之扁舟泛乎溟渤之汪洋天吳跳擲馮夷扇颯波濤駭起如山嶽

而公自泰然其樹骨也堅其養氣也全其措足也正而無所謂偏其制行也定於方而不斂於圓一以爲大丈夫一以爲好男子於康其斯爲公之自立也吾無間然

題孟蘭舟侍御事實冊

太谷孟蘭舟先生與先祖東冶公爲乾隆己卯鄉試同年友同出河間紀文達公門下志相得也繼畚劬時嘗聞先大夫廣軒公道公立朝風節心嚮往之迨後類上公車與哲嗣某某兩世叔數數相見於京師後爲外吏不復相聞晚歲望議歸田主講平遙書院先生文孫某世兄過訪以一冊相示曰此先祖請入鄉賢事實全冊也將付梓以廣其傳諸年家子惟君最耄願書數語於簡端以重其事繼畚喜而展讀生平嚮往之私爲之一快當和相之當軸

也同列斂手言路結舌其昌言擊之者前有先生後有曹公錫寶當世以爲兩鳴鳳云先大夫常爲繼畚談公軼事云公之改官吏部也總理爲諸城劉文正公一日公創奏稿文正摘字句小疵曰君文殊不精公艷然曰公當視例案之合否不當論文字之工拙某若專工文辭仍當視草清秘不至俯首入曹署爲簿書俗吏文正睨而笑曰孟公風力殊健及保送御史以公一人應選曰吾知其必能直言也繼畚生平慕公風烈前居言路後爲京卿亦嘗以其一得之愚屢有陳奏雖蒙兩朝聖人溫綸褒獎而勁直敢言之氣有媿於先哲多矣他日書之國史公固當爲一代名臣豈止崇祀鄉賢爲晉乘增重而已謹書數語而歸之以誌景仰之忱云同治元年九月年孫徐繼畚頓首拜識

書王印川廣文詩後

忻州人名錫繪時爲關二氏及因果之說而作

道家皆言老莊然老莊之書具在並無吐納燒鍊之說導引延年南華嘗及之不過引爲閒文並非漆園宗旨秦皇漢武信方士欺誑之說曰不死之藥可得黃金可成其說與老莊無涉兩人以帝王之力求之不已卒無成效劉安集方士著書乃鑿鑿言之道家諱其謀反泄族而曰拔宅飛昇有兩友人皆當世賢豪弟總角之交以兄事之兩君酷信燒鍊砂汞耗財致貧爐火薰灼致病嘗爭之曰秦皇漢武不能得而兩兄欲得之不量力矣且曰大道在是夫欲不死貪生也欲點金貪財也發念在貪而曰大道在是吾不信也兩君亦啞然失笑然爲之不已兩君非貪財亦不敢吞服因性好竒故爲人所愚後乃悔而不爲然家資已耗其半矣服金丹



而死者歷代多有之鍊內丹結聖胎而死者亦嘗屢見其人道家  
後來之書皆祖于吉太平書後漢書注言之甚悉卽張道陵之所  
祖今所謂張天師者張寶張角張魯衍其說爲五斗米教會稽王  
氏崇奉之與所謂老莊者風馬牛不相及也佛教起於五印度侏  
儻之俗與中國殊異周孔之化無由漸被彼土聰明之人勸令戒  
殺戒淫悚以果報使之懺悔其用意原無所謂非漢明帝感金人  
之夢無端遣使求之佛法遂入中國乃中國開門而揖非佛法之  
能亂中國也其時首崇信而捨身供養者楚王英也以謀反殺身  
廢國創建琳宮耗費民財者廣陵太守笮融也卒爲黃巾赤其族  
事佛求福乃更得禍昌黎之言可謂明辨特愚人迷不悟耳文中  
子曰佛西方之聖人也行於中國則亂朱子詩曰亦是聰明奇偉

人能空萬念絕纖塵可惜當年處西土未聽尼山講五倫兩大儒  
平心之談令人心折愚民所好之佛土苴木偶專爲祈福至淺鄙  
不足道士大夫所好之禪所謂宗門祖派其機鋒語似微妙可思  
然亦儒流佞佛者援儒家性命之說參入其中並非禪教本來面  
目此又儒家引之入室非禪教之能動人聽也先儒辨之已詳不  
煩覩縷我朝崇重佛教擁護兩藏立黃教喇嘛爲六大座分統內  
外蒙古乃因蒙古信佛順其俗而利導之使之安於游牧不生異  
心此列聖安邊大計執兩用中之微權俗儒不知妄議本朝之好  
佛何殊嚙語世祖世宗兩聖人皆深於禪理御選十大禪師語錄  
圓明居士語錄宗門老宿莫贊一辭然兩聖人之治天下皆純用  
儒術德比堯舜制軼武周大聖人學貫天人化裁通變更非小儒

所能窺測竊謂信佛者愚闢佛者亦多事先儒闢佛之書汗牛充棟照如日星更不煩後來薪積今髡徒徧天下不過游惰不畊之閒民紛紛揭竿者並非僧道則天下之治亂又何關乎此輩大抵儒者著書中無關佛數條則以爲不合繩尺窺其隱衷不過睥睨兩廡性牢耳陸王近禪而亦闢佛孫夏峯參合宋陸薛王而亦有闢佛之論自是講學格套與昌黎之大聲疾呼者異矣我輩讀書則修儒業爲吏則廣聖化元氣既足外戚自不能侵所謂經正則庶民興也否則二氏之外又益以回教天主教口誅筆伐不亦勞乎大作欲焚黃緇書卽焚骨人人火書廬居之意爲愚人說法最爲有益此正是昌黎家法河間紀文達公有言曰佛教不畏宋儒而畏昌黎宋儒所闢之佛就義理精微言之於彼教無傷也昌黎

之說行則髡徒無宿食之地故深畏之昔孟子闢楊墨一切不與深言而但責其無父無君此正昌黎學術之所由來大作深得此意拜服之至弟生平不喜道家之說其書荒誕不足觀佛氏教門之書稱爲相宗驅神役鬼幻杳無憑付之一笑宗門之書稱爲性宗卽禪教也楞嚴指月中多清悟之語意頗喜之然亦不過資爲談柄採爲詩料如讀鍾譚詩姑嘗別味實未入其藩籬也因讀大作輒刺刺書此以質高明大作製題所云好刻因果書者其人其書弟皆知之不足觀亦不足道其人已往付之勿論可矣弟畚再拜不宣

放筆爲之是壯悔堂文體此種議論俗儒所驚然未必敢駁也

自記

書王印川廣文詩注後

原注云文公過齊陽驛時前輩多辨其憶桃柳二姬者小說所載原非定論但此在公無  
關輕重即存此說爲詩詞點綴未爲不可與公生平大節正是無碍關壯繆上表孟德乞  
取秦宜賂喪於公磊羅行誼究屬何害而談公事者輒欲諱之反覺鄙陋鄙見如此請質  
高明

昌黎過壽陽驛詩謂憶桃柳二姬說本穿鑿不足深辨即使有之  
亦復於公奚累玉螭頻搖金釵半醉何碍於公之嶽嶽杜工部每  
飯不忘君而雲鬢玉臂語麗情悲屈靈均孤忠自忱而離騷一編  
言美人者居半蓋詩人吐談意興與宋儒講書語錄判然兩事蘇  
子卿仗節牧羊偶胡婦而生子王大令東晉名流桃葉桃根傳爲  
佳話白香山立朝風節砥柱中唐樊素小蠻星添柳宿胡忠簡忤  
秦檜遠竄南海黎娃握別垂涕沾臚文文山正氣挂乾坤作郡時

嘗有歌童舞女忠孝至性與男女大欲同出一源欲其真不欲其  
僞欲其節不欲其流流而無節豈特男女之淫穢伯奇握蠶而死  
申生不辨胙毒而死鸞權兵諫而自刎原軫唾地而歸元後之人  
悲其志未嘗不憫其愚故忠孝之流而無節其失爲愚男女之流  
而無節其失爲淫穢清濁雖異消息自同然不得戒愚而廢忠孝  
又豈能懲淫穢而廢男女聖賢豪傑大抵不遠人情孟子謂太王  
好色愛厥妃豈以戲語污太王乎梁伯鸞得孟光孔明得阿承女  
不嫌其醜設兩婦淑而且妍兩賢未必棄而不娶也風詩之義發  
乎情止乎禮義望其情而不使發聖賢亦不能但貴乎能止耳今  
有人曰我性不好色是僞也竊妻而逃或出於目不邪視之人又  
可信乎關壯繆取秦宜祿妻事極尋常與秉燭待旦有何加損娶

寡婦爲已失節伊川程子之言也宋以前尙無此說孔子爲人倫之至而伯魚之母子思之母子上之母三世皆改適使已婦失節又陷娶者以失節聖人忠恕不宜有此夫禮制因時而變風議因時而發宋承五季之後世風靡靡夫婦一倫輕褻已甚故伊川立此嚴峻之防使士大夫有所矜式非爲愚夫愚婦言也周制同姓者百世不同婚姻夏商以前五世卽通將執周道而議夏商之瀆倫可乎故執孔氏之家法而訛伊川妄人也執伊川之論而疑孔氏其妄不更甚乎柏舟之節楨幹人紀夫婦一倫賴之不墜伊川所謂餓死事小失節事大者匹婦能毅然行之誠令典之所重志乘之所必詳苟有其人宜竭力表章焉不能守而改醮亦常情耳彼固爲賢此亦中人未爲不肖也慕其名而強效之客氣一衰大

僂隨之矣弟生平所見如此讀大作詩注與鄙見相合書此呈政  
如乖謬幸垂示弟畚再拜

村學究見此議論未免驚訝然皆平正通達之言不讀書者自  
不知耳文體欲做壯悔堂叅以柳州之廉劄雖未成體而入股  
俗調已去大半自記

題沈歸愚杜詩註後

杜工部崔氏東山草堂詩有飯煮青泥坊底芹之句詩用眞韻芹  
係文韻沈歸愚註之曰芹當是蓴之誤余謂此說於韻學誠是然  
於南北物產殊昧味東山卽藍田山王右丞輞川別墅卽在附近  
故有爲問西莊王給事之句芹產北方處處有之蓴則產南方不  
特北方無此物卽南方亦惟蘇杭一帶有之北人未嘗其味亦並



不知其名張季鷹吳人也在洛陽因秋風起思蓴菜南歸使藍田有此物距洛陽止數日程何難專一力致以筐筥又何難策蹇一遊玩玉山藍水之奇勝蓴蕈而飽啖之古人以千里蓴羹爲南中佳味千里白下地名足見他處之無此味也杜詩係拘體以七古爲七律故亦用七古通韻試以此詩入七古固無不可亦無出韻之疑矣歸愚先生蘇州人於蓴菜數見不鮮以爲尋常之菜處處有之而不知關中斷無此物也

平遙超山書院創建重修原委碑記

平遙舊無書院康熙四十年蘭州王公穀爲邑宰始於縣署迤南路西創建超山書院規模宏敞講堂學舍皆備又於路東創建義學買田二百九十餘畝爲書院費買田六十餘畝爲義學費平遙

之有書院始於此其後寢廢弛書院義學皆改爲公館王公所買  
之田迷失無可稽考僅有義學田六十餘畝官禮生與禮房書吏  
分種之至今縣署之南土人猶稱爲書院門口然平遙之無書院  
則已久矣道光初武昌楊公霖川蒞茲土訪書院舊址則已改公  
館入交代無從追復會省垣修貢院平遙合縣攤捐銀三千二百  
兩有奇貢院工程止用銀二千兩發回銀一千二百兩有奇楊公  
邀集紳士議以此項已捐之銀創建書院又從城內鋪戶募捐銀  
七百兩有奇乃於學宮明倫堂後尊經閣兩旁空地各建房十五  
間又於尊經閣前建講堂三楹無門窗後壁於是書院始有其地  
然束修膏火無所出不能延師生童亦無住院肄業者道光十九  
年靈壽靳公廷鉅署平遙邀集紳士郭憲章劉充實等勸修文廟

首倡捐銀三百兩諸紳士隨募隨修文廟工竣止用銀七千兩有奇尙餘銀九千兩有奇諸紳僉議以平遙書院有其地而無其費徒存虛名今文廟所餘之項爲數不少曷以此爲書院費於是諸董事各捐資湊萬金之數呈請縣尊發合縣當商以六釐半生息每歲得息銀六百五十兩山長束脩火食銀三百兩生童膏火及雜費銀三百兩餘銀五十兩爲歷年修補房屋之用倣照祁縣太谷榆次章程生息之項由董事二十四家輪流值年經管官吏蓋不經手山長由紳士詢訪進士之有品學者稟縣尊送關敦請上游亦不札薦以縣尊爲主兩學師長爲監院每月官課一次山長院課一次山長束脩由值年董事按季致送生童膏火由值年學長給散一切雜費概由值年董事經理立法詳妥無弊可垂永久

咸豐丙辰余在上黨防堵竣事平遙官紳延請來此主講外吏多年學殖荒落惟少時困禮闈者十餘載於制義一途嘗耗心血衰年重理舊業尙有端緒可尋遂埋頭於此日與諸生分甘苦杜門却掃居然冬烘面目矣諸紳士以講堂無牆壁不可居又屋少山長不能挈眷口遂於講堂前後增牆壁又於講堂兩旁增東西廂房各三間東西廂房之北增小屋各二間爲安廚竈置新炭之地又以門外出路係偏坡車馬不能達取土填築爲闊巷中間銓磚爲門顏以版額於是書院之規模乃大備工料共費銀六百五十九兩歷年餘銀不足期分年彌補之余主講於此已七年因年老謀歸里而官紳孽袂投轄堅留不聽其去且屬爲文叙書院之原委乃搦管而爲之記

田蓮房倡修宗祠碑記

田氏宗祠之建也督工者爲田君誠齋倡議而定其規模者爲余門人田子蓮房宗人以兩君之獨任其勞也思立石於祠以不朽其人余旣爲文以表誠齋其宗人復以蓮房爲請先是蓮房修族譜乞余爲引又嘗偕誠齋赴祖籍忻州尋先世碑碣夫世人之所務者宮室妻妾之奉兩君獨懇懇於報本追遠可謂賢矣蓮房名逢露字潛零性嗜學好詩古文詞不喜爲科舉之學亦不樂仕宦嘗援例得翰林院待詔銜非所屑也慕太史公遊名山大川策蹇歷秦棧抵梁洋登祁山又至定軍山拜諸葛侯之墓東南走淮徐維揚姑蘇武林六朝唐宋以來山川之秀文獻古蹟之多靡不俯仰憑弔發爲詩歌家有小園雜植花樹與同人觴咏其中吟哦之

外兼蓄古畫遊蘇間得姬吳氏善爲小詩滌硯焚香助其雅興有石癖几案羅列皆米家石友也蓋其嗜好之不俗如此蓮房少孤事母孝性慷慨戚屬師友之間指困贈舟無難色性好風雅而無名士浮薄之習卽其倡修宗祠一事可以知其生平也余故樂得而記之

同溪續公墓表

公續姓諱吟字秉陽世居崢邑之同川西社里曾祖諱之琰字婉如祖諱涵字靜功由庠入太學考諱懋休字官賞亦入太學妣李太君邑庠生阜公女生熙章公諱昭乾隆甲子舉人繼妣張太君辛卯孝廉任雞澤縣天泉公女爲公所自出公六歲失恃九歲失怙惟兄嫂是依及長誠樸敦厚潛心詩書淹貫百家諸子年二十

四遊庠時菴蔣文宗特加賞識歲科試俱列前茅庚辰鄉薦己定魁選後以經文被黜公知數奇遂寄意古文詩詞以持風化嘗北至陰山東拜孔林南渡秦淮西遊寧武凡忠孝節義事將卽淹沒者竭力表揚著古詩近體詩二十四卷古今文十六卷山右詩存登古律數首餘未及梓其品行之端待人之厚教思之廣俱詳行述及門人德教碑嘉慶丙寅五月初一日捐館享壽七十有五元配曲太君台邑庠生益謙公女淑慎精明娣姒以女宗奉之儉而好施歿後數十年貧男婦念之不置先公三十六年卒享壽四十八歲生男二女二繼樊太君生女一克家增生娶薄氏舉人爾臧公女繼衛氏徐氏側趙氏承家增生娶曲氏舉人肅公女側張氏長女適武生梁錕銛次適薄廷茂次適曲氏

絃齋續先生墓表

余諸舅有古君子曰續絃齋先生先母續太君之從堂兄也余少時爲公所器愛每適外家公必來坐談良久問其學業加以訓勉又延余至其齋中讀其藏書故公之言論風采余知之最悉父諱吟號同溪篤學好古工於詩詞嘗挾千金遊白下蘇閩廣陵購書數車而歸閉戶讀之皆遍十赴鄉舉不第以諸生終公躋克家字子敬號絃齋同溪公之長子與弟承家皆能讀父書性質直好義言必由中不解作世故周旋語於宋元明先儒理學之書研其精義皆有心得尤熟歷代史事年代族貫記憶不爽憶少時侍公夜談每聞所未聞爲文好學桐城二方不屑揣摩時好故迄不利於名場制行方正端嚴合族子弟尊爲楷模偶有爭端公以一言剖



決無不悅服性愛才遇後學聰穎之士誘掖獎勸冀其有成或贈以膏火助以資斧使之成名家故中貲自奉甚約遇人急難推解無吝色以此晚年家事頗窘亦恬然不介意中歲嘗設帳於介休既而歸里閉戶讀書以老綜公生平於古所謂言忠信行篤敬者殆無愧歎自公卒後余每至外家不禁有老成典型之慨也元配薄氏乾隆戊午舉人陝西成縣知縣爾臧公女繼配衛氏君秦公女又繼配徐氏天海公女前苦乏嗣繼胞侄簡爲子年七十乃生一子竹徐氏出簡娶栗氏繼趙氏劉氏竹娶朱氏女三長適增生張慶榮次適薄明遠薄氏出三適康熏衛氏出孫大可娶曲氏簡出獻可娶劉氏大望幼竹出孫女三曾孫興賢娶張氏興仁娶王氏興讓幼大可出曾孫女二元孫海旺幼興賢出公生於乾隆十

五年十二月十三日戌時卒於道光七年十月二十三日寅時享壽七十有八以咸豐三年九月二十八日葬於中傾地之祖塋外弟竹屬余爲文以表其墓

趙生哀辭

昔吾先大夫施南公精研周易一生講學皆證之以易象俗儒不解也制義以理法爲主探其原於史漢八家古文教生徒以拆題布局分股抱柱之法趨時者不好也獨平遙趙子南陽見而好之時敦良齋遺書暨時文稿繼畚方裒集成書尙未授梓趙子從友人處見片紙卽手鈔之後受學於余門人梁彭孫教授乃鈔讀敦良齋遺書暨詩文稿奉以爲立身行己講書爲文之法後余罷官歸里主講平遙書院趙子來見執弟子禮旋携哲嗣思位課文數

篇來乞批余閱之驚異曰此敦良齋滴髓傳也蓋應試時思位年十四趙子以其未解場規辭因令從余受學至甲子年十八乃初應試入縣庠余以遠到許之七月間忽患喉痺咽不能下而卒余聞之不禁頓足惋悼而有蕙折蘭摧之嘆也思位幼有夙慧三歲四歲趙子鈔爾雅授之隨認隨讀有未及授而連下數句者人皆異之授以毛詩片刻能背誦兩三篇至六歲詩書易春秋已卒業九歲四書五經皆熟誦繼以左氏內外傳史漢唐宋八家古文唐賢古近體詩及敦良齋時文年十二卽能爲文用敦良齋拆題布局分股抱柱之法不失尺寸幼不好弄不解出穢語罵人同學諸童或侮之容讓不與校叱咤之聲未嘗及於雞犬當病革時或勸令吸鴉片烟可以救急默不應母勸之泣曰病勢如此鴉片豈能

救死生命也因病而死不失爲正若吸鴉片而仍不免於死失其正矣母其勿悲長呼爹娘數十聲而瞑於虛其可哀也已昔明道程子銘其殤子謂常人得天地之雜氣其壽命恒長得天地之清氣者其壽命恒短李剛主先生長子習仁卒方望溪銘其墓亦舉程子之說譬諸惡草踐踏芟蕪旋即萌生若芝蘭則殷勤培護往往憔悴而枯如思位之聰明天賦德器生成求之千萬人中不得其一壽命之不延固亦物理之常也然得正而斃亦已無憾於成人矣余主講平遙書院已十年苦乏清異之才最後乃得思位謂可以傳我學業而不料其遽逝也思位字兼山趙子取敦良之義而字之者也生於咸豐丁未十月十二日巳時卒於同治甲子七月三十日子時得年十八歲聘而未娶趙子將引例爲之立後其

友人李正華等痛念無已乞余爲文以壽其人乃揮老淚而哀以  
辭曰

既賦以夙慧兮而又促其年既予以成德兮而命不與之俱延如  
曇花之一現兮不崇朝而化爲雲煙於虜吾莫測其故兮欲呵壁  
而問天

謝政歸里祭主文

維大清咸豐二年十一月二十三日己巳繼畚謹祭告於顯高祖  
考妣顯曾祖考妣顯祖考妣顯考妣之塋墓前曰繼畚自庚寅服  
闋晉京供職迂謹自守不阿權要荷蒙宣宗成皇帝特達之知由  
編修轉御史旋擢守潯州甫半載卽擢延建邵道調署汀漳龍道  
適值夷氛正惡境土幸保無虞蒙恩擢兩廣運司旋擢廣東臬司

履任三月卽擢福建藩司在任三載有餘蒙恩擢廣西巡撫旋調任福建巡撫在任五年兩署閩浙總督以焦頭爛額之地值山窮水盡之時兼以撫局既定奉命專辦通商事務困心棘手不可名言繼畚謹守先訓飲冰茹蘗不取一錢矢慎矢勤力圖補救九年之中疆土幸無變亂夷情亦復安恬不料時局旣變議論日新繼畚堅守素志不肯輕開邊釁遂爲言路所攻彈章至於六七聖主憫其憊愚降補太僕寺少卿本年夏初上三漸宜防一疏蒙諭嘉獎旋有四川正主考之命閩務方畢奉文以閩撫任內起解官犯遲延革職伏念繼畚才力短淺未能建立勛名以光祖考誠爲可愧惟謹潔自守尙未玷先人清白方今時事艱難中外皆無從措手幸以微罪歸田未必非塞翁之福今已於十一月十一日抵里

從茲里居教授爲村學究以終身矣謹列酒餼用申虔告尙饗

致服先堂兄書 附

弟畚稟請哥哥大人安三月間赴廈門從旅寓中發回家信付親友之回家者帶去計六月間可到計回家者七人比弟自廈回署又來三人可笑亦可歎也弟之赴廈因米利堅國夷船有赴天津之信故自廈等侯相機勸阻駐廈兩旬杳無消息料係在粵商辦未遽北行於四月十九日回省接印錢糧奏銷在六月底艱難萬狀每年比較係八十七萬四千零一或不敷此數卽應獲咎今年之能否過去尙不可知明年則斷無過去之法如無轉動不得不作引疾之計前信已詳言之矣現在廈門夷務奉旨委辦責成至重然其事萬無反覆非弟所懼惟地方苦累情形日甚一日無米

之炊善者無如之何不得不引分以自全耳前四箴在署時弟偶談及厭東治之煩囂欲卜居鄉村渠云逢恩兄有空地一片可以造屋價不過百餘千弟曾有可以留買之說今思平地起屋爲費頗鉅囊橐稍充或可爲此若明春卽行下臺則兩袖清風力不辦此吾兄見四箴時可告以此事緩商不必急急也

致服先堂兄書

附

弟畚稟請哥哥大人安稟者弟婦於閏五月初十日長逝矣悲哉渠素本外腴中虧操勞傷之憂鬱傷之自到南方不服水土畏寒畏暑畏風時時作患雖少臥床之疾而中氣之虧損已甚此番抵任福州之後刻刻思歸弟因家中無人渠獨歸難以支立門戶且弟已定引退之局故勸其相待而不料其遽逝也先是閩省春夏



之間淫雨八旬五月初猶著綿衣至五月下旬晴霽酷熱非常渠  
向來不甚出汗至是忽胸前心口每日大汗如珠汗後覺心空氣  
怯以爲天熱之故亦不甚留意也初九日晚飯後自覺身發寒冷  
猶以爲受風感冒耳至夜交丑刻後忽通身大汗如雨言寒冷欲  
披裘急覓高麗參煎之已昏暈不醒六脈全停過一刻許六脈始  
回人乃清醒服高麗參湯錢許自言大渴喝米湯數碗沈沈睡去  
日出而醒云不過身體軟憊無大病症醫來看脈開清補之方亦  
以爲斷無他慮也已初服藥後仍喝米湯半碗甫就枕忽痰湧體  
厥急扶起則小便已下呼吸已停口開脈絕針刺不應延至未刻  
而通體如冰冥然去矣悲哉悲哉此因中氣表氣俱已虛極酷熱  
一蒸隨之耗散正醫書所謂大汗亡陽之症

又謂之  
脫症

當初覺心胸發

汗時急用峻補之劑猶可提住卽初九日夜間回醒後用六味回陽大劑加以遼參尙可挽回於萬一而病者旁人俱不知爲危症一旦奄忽遂至於此豈非數哉初九日猶是好人閒談至夜半而寢半日之間而已成永訣悲夫弟與弟婦相處三十六年情好最篤忽遭此事傷懷殊甚事已如此不得不爲莊生之達衣衾棺木毫無遺憾同城文武自督撫至從未千把祭弔者二百餘員祭席至五六十桌祭幃至五十餘掛亦可謂榮耀之極現定於三七日移殯於城外之開化寺弟已定退局遭此一事更無疑義將來弟回時帶伊靈柩同回亦所謂白首同歸矣至弟以後之事甚覺爲難若欲續絃在宦場中甚易然在以官爲家者則可弟已定引退之局南中婦女豈能過吾鄉日子若在家鄉續絃則吾鄉風俗誰

肯以室女婚五十以外之翁即使有之而頭童齒豁乃雍鬚作新郎豈非笑話最宜者青年後婚既能生育又可持家而二品大員萬無娶再醮之例且弟痛念亡妻此位亦不欲使他人再占既不續絃則惟有買妾燕姬人固平善苦於蠢蠢無知生育尙可望斷不能使執爨必須在家鄉物色一能學習家計之人方妥此事甚爲不易貌好者易得性良者難得吾鄉貧薄小戶之女亦不肯與人爲妾倘竟有之則最爲合式乞吾兄一留意焉以家道而論無嫡則無主腦後事可危弟此時總以子嗣爲第一要義嫡庶之難處已深知其味不如納妾之事權在我不至有許多牽制耳十二叔鐵甥已定與弟相偕同回弟引疾之期定於七月至遲亦不過九十月大抵到家總在明歲開春矣

丙午閏五月十九日

商辦立嗣書 附

繼畚謹告家長父兄繼畚年近六旬尙無嗣息思祖父兩世積累若敖不應遂倏然天道茫茫難可測度以人事言之則過繼一節所以濟人道之窮及令爲之亦其時也考之現行條例內一條云無子者許令同宗昭穆相當之姪承繼先儘同父周親次及大功小功細麻如俱無方許擇立遠房及同姓爲嗣又一條云一無子立嗣除依律外若繼子不得於所後之親聽其告官別立其或擇立賢能及所親愛者若於昭穆倫序不失不許宗族指以次序告爭並官司授理又一條云一無子立嗣若應繼之人平日先有嫌隙則於昭穆相當親族內擇賢擇愛敢從其便如族中希圖財產勒令承繼或慫恿擇繼以致涉訟者地方官立卽懲治仍將所賢

愛之人斷令立繼定例分明體貼天理人情可謂曲至世俗爲過繼一事肇啓爭端大約希冀得子不肯早定或至屬續之際倉卒相承或至蓋棺之後紛紜聚議訟爭之由從此而起若平日早經擇定則先儘服制固屬常法擇愛擇賢亦符定例又誰得起而爭也繼畚子然一身庶弟繼嗣未娶夭亡再無同胞兄弟同祖之服先二哥現亦尙未生子此外則二先叔祖四先叔祖之諸孫皆繼畚小功兄弟諸兄弟子息亦不甚繁或現係一子不應出繼或操農工別業並未讀書或年已長大授有家室年幼者亦多在十齡以上繼畚忝爲大臣擇立嗣子必須以讀書識字之人又必須自幼撫養恩義洽浹庶不致庭幃之間視如陌路接木者必方萌芽花者必初茁物理人情大抵如斯因思三先叔祖與先祖本係同

胞兄弟其諸孫亦本係繼畚小功兄弟因三先叔祖出繼別房服制遂疎隔一層然一本之親繼畚向未嘗殊視八弟繼壩係三先叔祖之孫現在生有二子其次子年甫五歲繼畚籌思再三惟過繼此子實洽中心之願一則繼壩從畚讀書資性頗覺聰明其所生之子或不至十分頑鈍再則年歲幼小果贏之負熟化無難謹援擇賢擇愛之例默告於先祖考妣先考妣之靈繼畚自揣涼德未能早生子息以綿血嗣誠無以仰對先靈今不得已而爲此舉何嘗不負疚引慝傷心掩涕惟宗祧大計關係非小繼畚斷自己心參以律例一言既出鐵案如山繼壩相依多年畚視之無殊胞弟渠方在中年生有二子今畚繼其次子於情固不忍不與於理亦不能不與謹告家長父兄此信到後卽持示繼壩如其願與卽

邀請宗族至親數人寫立繼約此子立嗣之後命名曰樹本年恭逢恩詔繼畚得蔭生卽與此子此一兩年中卽令繼壻送之來署以便及早撫養教訓冀其成立繼畚謹告

致先篋八弟書

附

先篋八弟近好家眷已於三月三十日起身計初五六日可到東方信息近得省報山東河南大獲勝仗張樂新擒匪退回二百餘里又新泰郭二兄云有人從東昌來云擒匪已退回安徽巢穴等語此是大好消息前所慮者擒匪裏脅動輒數步倘其西竄晉省防堵單弱全不可靠直是入無人之境至冠縣一帶之土匪乃是白蓮教山東直隸河南之教匪自乾隆年間至道光年間鬧事已數十次不過據一城掠旁縣從來不敢遠竄與川楚教匪迥然不

同捻匪既退教匪不足慮也我所以決意打發家眷回去者因各處賊匪未能全平其聚散進退時時變動太汾之平介祁太榆五大縣夙著富名賊所垂涎實難保其無事我非官非紳在此不過教書耳拖男帶女處此危險之地刻刻懸心豈不大謬家眷既回書箱衣箱亦已送回十之七八果有驚信單車避去至易易耳曾子之居武城師法具在與臣也微也之子思豈可同日語哉今年平介兩處外課將及三十人束脩之多寡不同約計四百金內外自因三拔貢之故人情自來如此七百金之館地不爲不好且平介兩處諸生及平遙董事已有堅留之議然我內決於心不復留戀者年已望七塊然獨處批閱文課辛苦異常而飲食起居無人調攝亦太自苦若携兒女居此則內懷戒心一聞風鶴未免心驚



每歲回家則車馬之勞祁寒之苦實非衰年所能堪忍明知忻州  
設立散館斷不能好然心神安貼往來自便其苦處不過窮耳一  
生讀書談道安貧二字未嘗不知其難然幸而富之一境總未閱  
歷貧之一境已成見慣司空今景迫桑榆倘能學得安貧二字亦  
尚不辜負此貧傳齊主詩曰亦知貧難耐  
耐即醫貧方真至言也無怨談何容易能學子貢之無  
諂子路之不佞求亦幸甚矣頃郭二兄約四月杪至汾州一遊我  
已諾之中秋節後天氣涼爽雁汀先生之匯清別業亦以清理就  
緒當脂車一遊作數日盤桓也芝田詩稿選訖卽寄上趙師彭病  
我爲服小陷胸合白虎吐出黑血片通身發狂汗今稀粥調養旬  
餘已大致平復雁翁芝田俱爲我致意四月初八日七兄健男手  
書

文彙卷一

一頁 十四行候改侯 二頁 八行底改底 五頁 十八行但改旦 八頁

一行於食飲於字衍 十二頁 二行息字翻 六行七行九行並皆改絃 十三頁

十二行針改斜 十八頁 一行辛卯當作己卯 二十二頁 十行批改梳

文彙卷二

一頁 二行送顏壽與題目誤低一格 二頁 三行攝改摺 四頁 十三行太改

大 五頁 十八行邊改吝 十二頁 三行輒改徹 七行與改典 十四頁

七行偶改觸 十行炳改柄 二十頁 十三行拉改絃 二十行夫改恭 二十一

頁 一行服改腹夫改恭 十七行州改舟 二十二頁 五行擗改搏 二十三頁

二行勞改榮 四行卻改削 十六行礪改竭

文彙卷三

九頁 一行擗改搏 十三頁 十三行底改底 十六頁 二十行作改昨 十

八頁 五行糜改糜 二十三頁 六行養驪驪改驪 十行家改業 二十八頁

六行魯以蕩佚使簡易句使字衍 十五行消息二字衍 二十九頁 十二行寶改寶

文彙卷四

一頁 二十一頁 鹽改鹽 五頁 四行情改隋 六頁 二行運改連 七頁

二行製改掣 十五頁 四行倭改佞 十三行照改昭 十九頁 十八行蓋改

概 二十一頁 七行端改端 二十三頁 十行 詩改時 二十八頁 四行

令改今 十行敢改聽